

OVIDE

LES TRISTES (3532 vers)

T1_1 v.1 Parve (nec invideo) sine me, liber, ibis in Urbem :
 2 ei mihi ! quod domino non licet ire tuo.
 3 Vade, sed incultus, qualem decet exulis esse.
 4 Infelix, habitum temporis hujus habe !
 5 Nec te purpureo velent vaccinia fuco -
 6 non est conveniens luctibus ille color -
 7 nec titulus minio, nec cedro charta notetur,
 8 candida nec nigra cornua fronte geras !
 9 Felices ornent haec instrumenta libellos :
 10 fortunae memorem te decet esse meae.
 11 Nec fragili geminae poliantur pumice frontes,
 12 hirsutus sparsis ut videare comis.
 13 Neve liturarum pudeat ; qui viderit illas,
 14 de lacrimis factas sentiat esse meis.
 15 Vade, liber, verbisque meis loca grata saluta !
 16 Contingam certe quo licet illa pede.
 17 Siquis, ut in populo, nostri non inmemor illi,
 18 siquis, qui, quid agam, forte requiret, erit,
 19 vivere me dices, salvum tamen esse negabis ;
 20 id quoque, quod vivam, munus habere dei.
 21 Atque ita tu tacitus (quaerenti plura legendum)
 22 ne quae non opus est forte loquere cave !
 23 Protinus admonitus repetet mea crimina lector
 24 et peragar populi publicus ore reus.
 25 Tu cave defendas, quamvis mordebere dictis !
 26 causa patrocini non bona major erit.
 27 Invenies aliquem qui me suspiret ademptum
 28 carmina nec siccis perlegat ista genis,
 29 et tacitus secum, ne quis malus audiat, optet
 30 sit mea lenito Caesare poena levis.
 31 Nos quoque, quisquis erit, ne sit miser ille precamur
 32 placatos miseris qui volet esse deos ;
 33 quaeque volet, rata sint ablataque principis ira
 34 sedibus in patriis det mihi posse mori.
 35 Ut peragas mandata, liber, culpabere forsan
 36 ingenique minor laude ferere mei.
 37 Judicis officium est, ut res, ita tempora rerum
 38 quaerere ; quaesito tempore tutus eris.
 39 Carmina proveniunt animo deducta sereno :
 40 nubila sunt subitis pectora nostra malis.
 41 Carmina secessum scribentis et otia quaerunt :
 42 me mare, me venti, me fera jactat hiems.
 43 Carminibus metus omnis abest : ego perditus ense
 44 haesurum jugulo jam puto jamque meo.
 45 Haec quoque quod facio, iudex mirabitur aequus
 46 scriptaque cum venia qualiacumque leget.
 47 Da mihi Maeoniden et tot circumspice casus :
 48 ingenium tantis excidet omne malis.

49 Denique securus famaе, liber, ire memento,
 50 nec tibi sit lecto displicuisse pudor.
 51 Non ita se praebet nobis Fortuna secundam
 52 ut tibi sit ratio laudis habenda tuae.
 53 Donec eram sospes, tituli tangebar amore
 54 quaerendique mihi nominis ardor erat.
 55 Carmina nunc si non studiumque, quod obfuit, odi,
 56 sit satis ! ingenio sic fuga parta meo.
 57 Tu tamen, i pro me, tu, cui licet, aspice Romam.
 58 Di facerent possem nunc meus esse liber !
 59 Nec te, quod venias magnam peregrinus in urbem,
 60 ignotum populo posse venire puta.
 61 Ut titulo careas, ipso noscere colore,
 62 dissimulare velis, te liquet esse meum.
 63 Clam tamen intrato, ne te mea carmina laedant :
 64 non sunt ut quondam plena favoris erant.
 65 Si quis erit qui te, quia sis meus, esse legendum
 66 non putet, e gremio reiciatque suo :
 67 "Inspice, dic, titulum : non sum praeceptor amoris ;
 68 quas meruit, poenas jam dedit illud opus."
 69 Forsitan expectes an in alta Palatia missum
 70 scandere te jubeam Caesareamque domum ?
 71 Ignoscant augusta mihi loca dique locorum !
 72 Venit in hoc illa fulmen ab arce caput.
 73 Esse quidem memini mitissima sedibus illis
 74 numina, sed timeo qui nocuere deos.
 75 Terretur minimo pennae stridore columba
 76 unguibus, accipiter, saucia facta tuis ;
 77 nec procul a stabulis audet discedere, si qua
 78 excussa est avidi dentibus agna lupi.
 79 Vitaret caelum Phaethon, si viveret et quos
 80 optarat stulte, tangere nollet equos.
 81 Me quoque, quae sensi, fateor Jovis arma timere,
 82 me reor infesto, cum tonat, igne peti.
 83 Quicumque Argolica de classe Capherea fugit,
 84 semper ab Euboicis vela retorquet aquis,
 85 et mea cumba, semel vasta percussa procella,
 86 illum, quo laesa est, horret adire locum.
 87 Ergo cave, liber, et timida circumspice mente
 88 ut satis a media sit tibi plebe legi.
 89 Dum petit infirmis nimium sublimia pennis
 90 Icarus, aequoreis nomina fecit aquis.
 91 Difficile est tamen hinc remis utaris an aura
 92 dicere : consilium resque locusque dabunt.
 93 Si poteris vacuo tradi, si cuncta videbis
 94 mitia, si vires fregerit ira suas,
 95 si quis erit qui te dubitantem et adire timentem
 96 tradat et ante tamen pauca loquatur, adi !
 97 Luce bona dominoque tuo felicior ipse
 98 pervenias illuc et mala nostra leves.
 99 Namque ea vel nemo vel qui mihi vulnera fecit,
 100 solus Achilleo tollere more potest.
 101 Tantum ne noceas, dum vis prodesse, videto
 102 (nam spes est animi nostra timore minor)
 103 quaeque quiescebat, ne mota resaeviat ira,
 104 et poenae tu sis altera causa, cave !
 105 Cum tamen in nostrum fueris penetrabile receptus
 106 contigerisque tuam, scrinia curva, domum,

107 aspicias illic positos ex ordine fratres
 108 quos studium cunctos evigilavit idem.
 109 Cetera turba palam titulos ostendet apertos,
 110 et sua detecta nomina fronte geret ;
 111 tres procul obscura latitantes parte videbis :
 112 hi qui, quod nemo nescit, amare docent.
 113 Hos tu vel fugias, vel, si satis oris habebis,
 114 Oedipodas facito Telegonosque voces.
 115 Deque tribus, moneo, si qua est tibi cura parentis,
 116 ne quemquam, quamvis ipse docebit, ames.
 117 Sunt quoque mutatae ter quinque volumina formae,
 118 nuper ab exequiis carmina rapta meis.
 119 His mando dicas, inter mutata referri
 120 fortunae vultum corpora posse meae ;
 121 namque ea dissimilis subito est effecta priori,
 122 flendaque nunc aliquo tempore laeta fuit.
 123 Plura quidem mandare tibi, si quaeris, habebam,
 124 sed vereor tardae causa fuisse viae.
 125 Et si quae subeunt tecum, liber, omnia ferres,
 126 sarcina laturo magna futurus eras.
 127 Longa via est, propera ! nobis habitabitur orbis
 128 ultimus, a terra terra remota mea.

T1_2 v.1 Di maris et caeli (quid enim nisi vota supersunt ?)
 2 solvere quassatae parcite membra ratis !
 3 neve, precor, magni subscribite Caesaris irae !
 4 Saepe premente deo fert deus alter opem.
 5 Mulciber in Trojam, pro Troja stabat Apollo ;
 6 aequa Venus Teucris, Pallas iniqua fuit ;
 7 oderat Aenean propior Saturnia Turno ;
 8 ille tamen Veneris numine tutus erat.
 9 Saepe ferox cautum petiit Neptunus Ulixem,
 10 eripuit patruo saepe Minerva suo.
 11 Et nobis aliquod, quamvis distamus ab illis,
 12 quis vetat irato numen adesse deo ?
 13 Verba miser frustra non proficientia perdo ;
 14 ipsa graves spargunt ora loquentis aquae,
 15 terribilisque Notus jactat mea dicta precesque
 16 ad quos mittuntur non sinit ire deos.
 17 Ergo idem venti, ne causa laedar in una,
 18 velaque nescio quo votaue nostra ferunt.
 19 Me miserum ! Quanti montes volvuntur aquarum !
 20 Jam jam tacturos sidera summa putes.
 21 Quantae diducto subsidunt aequore valles !
 22 Jam jam tacturas Tartara nigra putes.
 23 Quocumque aspicio, nihil est, nisi pontus et aer,
 24 fluctibus hic tumidus, nubibus ille minax.
 25 Inter utrumque fremunt inmani murmure venti.
 26 Nescit cui domino pareat, unda maris :
 27 nam modo purpureo vires capit Eurus ab ortu,
 28 nunc Zephyrus sero vespere missus adest,
 29 nunc sicca gelidus Boreas bacchatur ab Arcto,
 30 nunc Notus adversa proelia fronte gerit.
 31 Rector in incerto est nec quid fugiatve petatve
 32 invenit : ambiguus ars stupet ipsa malis.
 33 Scilicet occidimus, nec spes est ulla salutis,

34 dumque loquor, vultus obruit unda meos.
 35 Opprimet hanc animam fluctus, frustra que precanti
 36 ore necaturas accipiemus aquas.
 37 At pia nil aliud quam me dolet exule conjunx ;
 38 hoc unum nostri scitque gemitque mali.
 39 Nescit in immenso jactari corpora ponto,
 40 nescit agi ventis, nescit adesse necem.
 41 O bene quod non sum mecum conscendere passus,
 42 ne mihi mors misero bis patienda foret !
 43 At nunc, ut peream, quoniam caret illa periclo,
 44 dimidia certe parte superstes ero.
 45 Ei mihi, quam celeri micuerunt nubila flamma !
 46 Quantus ab aethereo personat axe fragor !
 47 Nec levius tabulae laterum feriuntur ab undis
 48 quam grave ballistae moenia pulsat onus.
 49 Qui venit hic fluctus, fluctus supereminet omnes :
 50 posterior nono est undecimoque prior.
 51 Nec letum timeo, genus est miserabile leti.
 52 Demite naufragium, mors mihi munus erit.
 53 Est aliquid fatove suo ferrove cadentem
 54 in solita moriens ponere corpus humo,
 55 et mandare suis aliqua et sperare sepulcrum
 56 et non aequoreis piscibus esse cibum.
 57 Fingite me dignum tali nece, non ego solus
 58 hic vehor : inmeritos cur mea poena trahit ?
 59 Pro superi viridesque dei, quibus aequora curae,
 60 utraque jam vestras sistite turba minas.
 61 Quamque dedit vitam mitissima Caesaris ira,
 62 hanc sinite infelix in loca jussa feram.
 63 Si quoque quam merui poena me pendere vultis,
 64 culpa mea est ipso iudice morte minor.
 65 Mittere me Stygias si jam voluisset in undas
 66 Caesar, in hoc vestra non eguisset ope.
 67 Est illi nostri non invidiosa cruoris
 68 copia, quodque dedit, cum volet, ipse feret.
 69 Vos modo, quos certe nullo puto crimine laesi,
 70 contenti nostris jam, precor, este malis !
 71 Nec tamen, ut cuncti miserum servare velitis,
 72 quod periit, salvum jam caput esse potest.
 73 Ut mare considat ventisque ferentibus utar,
 74 ut mihi parcatis, non minus exul ero.
 75 Non ego divitias avidus sine fine parandi
 76 latum mutandis mercibus aequor aro ;
 77 nec peto, quas quondam petii studiosus, Athenas,
 78 oppida non Asiae, non loca visa prius ;
 79 non ut Alexandri claram delatus in urbem
 80 delicias videam, Nile jocose, tuas.
 81 Quod faciles opto ventos (quis credere posset ?)
 82 Sarmatis est tellus, quam mea vela petunt ;
 83 obligor ut tangam laevi fera litora Ponti ;
 84 quodque sit a patria tam fuga tarda queror ;
 85 nescio quo videam positos ut in orbe Tomitas,
 86 exilem facio per mea vota viam.
 87 Seu me diligitis, tantos conpescite fluctus
 88 pronaque sint nostrae numina vestra rati ;
 89 seu magis odistis, jussae me advertite terrae :
 90 supplicii pars est in regione mei.
 91 Ferte (quid hic facio ?) rapidi mea corpora venti !

92 Ausonios fines cur mea vela volunt ?
 93 Noluit hoc Caesar. Quid, quem fugat ille, tenetis ?
 94 Aspiciat vultus Pontica terra meos.
 95 Et jubet et merui ; nec quae damnaverit ille
 96 crimina defendi fasque piunique puto.
 97 Si tamen acta deos numquam mortalia fallunt,
 98 a culpa facinus scitis abesse mea.
 99 Immo ita, si scitis, si me meus abstulit error
 100 stultaque mens nobis, non scelerata fuit,
 101 quod licet et minimis, domui si favimus illi,
 102 si satis Augusti publica jussa mihi,
 103 hoc duce si dixi felicia saecula proque
 104 Caesare tura pius Caesaribusque dedi,
 105 si fuit hic animus nobis, ita parcite, divi !
 106 Si minus, alta cadens obruat unda caput !
 107 Fallor an incipiunt gravidae vanescere nubes,
 108 victaque mutati frangitur ira maris ?
 109 Non casu, vos sed sub condicione vocati,
 110 fallere quos non est, hanc mihi fertis opem.

T1_3 v.1 Cum subit illius tristissima noctis imago,
 2 qua mihi supremum tempus in urbe fuit,
 3 cum repeto noctem, qua tot mihi cara reliqui,
 4 labitur ex oculis nunc quoque gutta meis.
 5 Jam prope lux aderat, cum me discedere Caesar
 6 finibus extremae jusserat Ausoniae.
 7 Nec spatium nec mens fuerat satis apta parandi :
 8 torpuerant longa pectora nostra mora ;
 9 non mihi servorum, comites non cura legendi,
 10 non aptae profugo vestis opisve fuit.
 11 Non aliter stupui, quam qui Jovis ignibus ictus
 12 vivit et est vitae nescius ipse suae.
 13 Ut tamen hanc animi nubem dolor ipse removit
 14 et tandem sensus convaluere mei,
 15 adloquor extremum maestos abiturus amicos,
 16 qui modo de multis unus et alter erat.
 17 Uxor amans flentem flens acrius ipsa tenebat
 18 imbre per indignas usque cadente genas.
 19 Nata procul Libycis aberat diversa sub oris,
 20 nec poterat fati certior esse mei.
 21 Quocumque aspiceres, luctus gemitusque sonabant
 22 formaque non taciti funeris intus erat.
 23 Femina virque meo pueri quoque funere maerent
 24 inque domo lacrimas angulus omnis habet.
 25 Si licet exemplis in parvis grandibus uti,
 26 haec facies Trojae, cum caperetur, erat.
 27 Jamque quiescebant voces hominumque canumque
 28 Lunaque nocturnos alta regebat equos :
 29 hanc ego suspiciens et ad hanc Capitolia cernens
 30 quae nostro frustra juncta fuere Lari,
 31 "Numina vicinis habitantia sedibus, inquam,
 32 jamque oculis numquam templa videnda meis
 33 dique relinquendi quos urbs habet alta Quirini,
 34 este salutati tempus in omne mihi !
 35 Et quamquam sero clipeum post vulnera sumo,
 36 attamen hanc odiis exonerate fugam

37 caelestique viro quis me deceperit error
 38 dicite, pro culpa ne scelus esse putet,
 39 ut quod vos scitis, poenae quoque sentiat auctor :
 40 placato possum non miser esse deo."
 41 Hac prece adoravi superos ego, pluribus uxor
 42 singultu medios impediens sonos.
 43 Illa etiam ante Lares passis adstrata capillis
 44 contigit extinctos ore tremente focos
 45 multaque in aversos effudit verba Penates
 46 pro deplorato non valitura viro.
 47 Jamque morae spatium nox praecipitata negabat
 48 versaque ab axe suo Parrhasis Arctos erat.
 49 Quid facerem ? Blando patriae retinebar amore,
 50 ultima sed jussae nox erat illa fugae.
 51 A ! quotiens aliquo dixi properante : "Quid urges ?
 52 Vel quo festinas ire, vel unde, vide."
 53 A ! quotiens certam me sum mentitus habere
 54 horam propositae quae foret apta viae.
 55 Ter limen tetigi, ter sum revocatus et ipse
 56 indulgens animo pes mihi tardus erat.
 57 Saepe "vale" dicto rursus sum multa locutus
 58 et quasi discedens oscula summa dedi.
 59 Saepe eadem mandata dedi meque ipse fefelli
 60 respiciens oculis pignora cara meis.
 61 Denique : "Quid propero ? Scythia est quo mittimur, inquam,
 62 Roma relinquenda est : utraque justa mora.
 63 Uxor in aeternum vivo mihi viva negatur
 64 et domus et fidae dulcia membra domus,
 65 quosque ego dilexi fraterno more sodales.
 66 O mihi Thesea pectora juncta fide !
 67 Dum licet, amplectar ; numquam fortasse licebit
 68 amplius ; in lucro est quae datur hora mihi."
 69 Nec mora, sermonis verba imperfecta relinquo
 70 complectens animo proxima quaeque meo.
 71 Dum loquor et flemus, caelo nitidissimus alto
 72 stella gravis nobis Lucifer ortus erat.
 73 Dividor haud aliter, quam si mea membra relinquam
 74 et pars abrumpi corpore visa suo est.
 75 Sic doluit Mettus, tunc cum in contraria versos
 76 ultores habuit prodicionis equos.
 77 Tum vero exoritur clamor gemitusque meorum
 78 et feriunt maestae pectora nuda manus ;
 79 tum vero conjunx umeris abeuntis inhaerens
 80 miscuit haec lacrimis tristia verba meis :
 81 "Non potes avelli ; simul hinc, simul ibimus, inquit,
 82 te sequar et conjunx exulis exul ero.
 83 Et mihi facta via est, et me capit ultima tellus :
 84 accedam profugae sarcina parva rati.
 85 Te jubet e patria discedere Caesaris ira,
 86 me pietas : pietas haec mihi Caesar erit."
 87 Talia temptabat, sicut temptaverat ante,
 88 vixque dedit victas utilitate manus.
 89 Egredior, sive illud erat sine funere ferri,
 90 squalidus, inmissis hirta per ora comis.
 91 Illa dolore amens tenebris narratur abortis
 92 semianimis media procubuisse domo ;
 93 utque resurrexit foedatis pulvere turpi
 94 crinibus et gelida membra levavit humo,

95 se modo, desertos modo complorasse Penates,
 96 nomen et erepti saepe vocasse viri,
 97 nec gemuisse minus quam si nataeque virique
 98 vidisset structos corpus habere rogos,
 99 et voluisse mori, moriendo ponere sensus,
 100 respectuque tamen non periisse mei.
 101 Vivat et absentem, quoniam sic fata tulerunt,
 102 vivat ut auxilio sublevet usque suo !

T1_4 v.1 Tingitur oceano custos Erymanthidos ursae
 2 aequoreasque suo sidere turbat aquas ;
 3 nos tamen Ionium non nostra findimus aequor
 4 sponte, sed audaces cogimur esse metu.
 5 Me miserum ! Quantis increscunt aequora ventis,
 6 erutaque ex imis fervet harena vadis !
 7 Monte nec inferior prorae puppive recurvae
 8 insilit et pictos verberat unda deos.
 9 Pineae texta sonant pulsu, stridore rudentes,
 10 ingemit et nostris ipsa carina malis.
 11 Navita confessus gelidum pallore timorem,
 12 jam sequitur victus, non regit arte ratem
 13 utque parum validus non proficientia rector
 14 cervicis rigidae frena remittit equo,
 15 sic, non quo voluit, sed quo rapit impetus undae,
 16 aurigam video vela dedisse rati.
 17 Quod nisi mutatas emiserit Aeolus auras,
 18 in loca jam nobis non adeunda ferar.
 19 Nam procul Illyriis laeva de parte relictis
 20 interdicta mihi cernitur Italia.
 21 Desinat in vetitas, quaeso, contendere terras,
 22 et mecum magno pareat aura deo !
 23 Dum loquor, et timeo pariter cupioque repelli,
 24 increpuit quantis viribus unda latus !
 25 Parcite, caerulei, vos parcite numina ponti,
 26 infestumque mihi sit satis esse Jovem !
 27 Vos animam saevae fessam subducite morti,
 28 si modo, qui periit, non periisse potest !

T1_5 v.1 O mihi post nullos umquam memorande sodales,
 2 et cui praecipue sors mea visa sua est,
 3 attonitum qui me, memini, carissime, primus
 4 ausus es adloquio sustinuisse tuo,
 5 qui mihi consilium vivendi mite dedisti,
 6 cum foret in misero pectore mortis amor,
 7 scis bene cui dicam positus pro nomine signis,
 8 officium nec te fallit, amice, tuum.
 9 Haec mihi semper erunt imis infixae medullis
 10 perpetuusque animae debitor hujus ero,
 11 spiritus in vacuas prius hic tenuandus in auras
 12 ibit et in tepido deseret ossa rogo
 13 quam subeant animo meritorum obliviae nostro
 14 et longa pietas excidat ista die.
 15 Di tibi sint faciles, et opis nullius egentem
 16 fortunam praestent dissimilemque meae !

17 Si tamen haec navis vento ferretur amico,
 18 ignoraretur forsitan ista fides :
 19 Thesea Pirithous non tam sensisset amicum,
 20 si non infernas vivus adisset aquas ;
 21 ut foret exemplum veri Phoceus amoris,
 22 fecerunt furiae, tristis Oresta, tuae ;
 23 si non Euryalus Rutulos cecidisset in hostes,
 24 Hyrtacidae Nisi gloria nulla foret.
 25 Scilicet ut flavum spectatur in ignibus aurum,
 26 tempore sic duro est inspicienda fides.
 27 Dum juvat et vultu ridet Fortuna sereno,
 28 indelibatas cuncta sequuntur opes ;
 29 at simul intonuit, fugiunt nec noscitur ulli
 30 agminibus comitum qui modo cinctus erat ;
 31 atque haec exemplis quondam collecta priorum
 32 nunc mihi sunt propriis cognita vera malis.
 33 Vix duo tresve mihi de tot superestis amici ;
 34 cetera Fortunae, non mea turba fuit.
 35 Quo magis, o pauci, rebus succurrite laesis,
 36 et date naufragio litora tuta meo ;
 37 neve metu falso nimium trepidate timentes
 38 hac offendatur ne pietate deus.
 39 Saepe fidem adversis etiam laudavit in armis
 40 inque suis amat hanc Caesar, in hoste probat.
 41 Causa mea est melior, qui non contraria fovi
 42 arma, sed hanc merui simplicitate fugam.
 43 Invigiles igitur nostris pro casibus oro,
 44 deminui siqua numinis ira potest.
 45 Scire meos casus siquis desiderat omnes,
 46 plus quam quod fieri res sinit, ille petit.
 47 Tot mala sum passus quot in aethere sidera lucent
 48 parvaque quot siccus corpora pulvis habet ;
 49 multaque credibili tulimus majora ratamque,
 50 quamvis acciderint, non habitura fidem ;
 51 pars etiam quaedam mecum moriatur oportet
 52 meque velim possit dissimulante tegi.
 53 Si vox infragilis, pectus mihi firmitus aere
 54 pluraque cum linguis pluribus ora forent,
 55 non tamen idcirco complecterer omnia verbis
 56 materia vires exsuperante meas.
 57 Pro duce Neritio docti, mala nostra, poetae,
 58 scribite : Neritio nam mala plura tuli.
 59 Ille brevi spatio multis erravit in annis
 60 inter Dulichias Iliacasque domos :
 61 nos freta sideribus totis distantia mensos
 62 detulit in Geticos Caesaris ira sinus.
 63 Ille habuit fidamque manum sociosque fideles ;
 64 me profugum comites deseruere mei.
 65 Ille suam laetus patriam victorque petebat ;
 66 a patria fugi victus et exul ego ;
 67 nec mihi Dulichium domus est Ithaceve Samosve,
 68 poena quibus non est grandis abesse locis,
 69 sed quae de septem totum circumspicit orbem
 70 montibus, imperii Roma deumque locus.
 71 Illi corpus erat durum patiensque laborum,
 72 invalidae vires ingenuaeque mihi.
 73 Ille erat assidue saevis agitatus in armis ;
 74 adsuetus studiis mollibus ipse fui.

75 Me deus oppressit, nullo mala nostra levante ;
 76 bellatrix illi diva ferebat opem.
 77 Cumque minor Jove sit tumidis qui regnat in undis,
 78 illum Neptuni, me Jovis ira premit.
 79 Adde quod illius pars maxima ficta laborum ;
 80 ponitur in nostris fabula nulla malis.
 81 Denique quaesitos tetigit tamen ille Penates,
 82 quaeque diu petiit, contigit arva tamen ;
 83 at mihi perpetuo patria tellure carendum,
 84 ni fuerit laesi mollior ira dei.

T1_6 v.1 Nec tantum Clario est Lyde dilecta poetae
 2 nec tantum Coo Bittis amata suo est,
 3 pectoribus quantum tu nostris, uxor, inhaeres,
 4 digna minus misero, non meliore viro.
 5 Te mea subposita veluti trabe fulta ruina est ;
 6 si quid adhuc ego sum, muneris omne tui est.
 7 Tu facis ut spoliolum non sim nec nuder ab illis
 8 naufragii tabulas qui petiere mei.
 9 Utque rapax stimulante fame cupidusque cruoris
 10 incustoditum captat ovile lupus,
 11 aut ut edax vultur corpus circumspicit ecquod
 12 sub nulla positum cernere possit humo,
 13 sic mea nescio quis, rebus male fidus acerbis,
 14 in bona venturus, si paterere, fuit.
 15 Hunc tua per fortis virtus summovit amicos,
 16 nulla quibus reddi gratia digna potest.
 17 Ergo quam misero, tam vero teste probaris,
 18 hic aliquod pondus si modo testis habet.
 19 Nec probitate tua prior est aut Hectoris uxor
 20 aut comes extincto Laodamia viro.
 21 Tu si Maeonium vatem sortita fuisses,
 22 Penelopes esset fama secunda tuae,
 23 sive tibi hoc debes, nullo pia facta magistro,
 24 cumque nova mores sunt tibi luce dati,
 25 femina seu princeps omnes tibi culta per annos
 26 te docet exemplum conjugis esse bonae,
 27 adsimilemque sui longa adsuetudine fecit,
 28 grandia si parvis adsimilare licet.
 29 Ei mihi, non magnas quod habent mea carmina vires,
 30 nostraque sunt meritis ora minora tuis.
 31 Si quid et in nobis vivi fuit ante vigoris,
 32 extinctum longis occidit omne malis !
 33 Prima locum sanctas heroidas inter haberes,
 34 prima bonis animi conspicerere tui.
 35 Quantumcumque tamen praeconia nostra valebunt,
 36 carminibus vives tempus in omne meis.

T1_7 v.1 Si quis habes nostri similes in imagine vultus,
 2 deme meis hederas, Bacchica sarta, comis.
 3 Ista decent laetos felicia signa poetas :
 4 temporibus non est apta corona meis.
 5 Hoc tibi dissimula, senti tamen, optime, dici,
 6 in digito qui me fersque refersque tuo

7 effigiemque meam fulvo complexus in auro
 8 cara relegati, quae potes, ora vides.
 9 Quae quotiens spectas, subeat tibi dicere forsan :
 10 "Quam procul a nobis Naso sodalis abest !"
 11 Grata tua est pietas, sed carmina major imago
 12 sunt mea quae mando qualiacumque legas,
 13 carmina mutatas hominum dicentia formas,
 14 infelix domini quod fuga rupit opus.
 15 Haec ego discedens, sicut bene multa meorum,
 16 ipse mea posui maestus in igne manu ;
 17 utque cremasse suum fertur sub stipite natum
 18 Thestias, et melior matre fuisse soror,
 19 sic ego non meritos, mecum peritura, libellos
 20 imposui rapidis, viscera nostra, rogis,
 21 vel quod eram Musas, ut crimina nostra, perosus,
 22 vel quod adhuc crescens et rude carmen erat.
 23 Quae quoniam non sunt penitus sublata, sed extant
 24 (pluribus exemplis scripta fuisse reor),
 25 nunc precor ut vivant et non ignava legentem
 26 otia delectent admoneantque mei.
 27 Nec tamen illa legi poterunt patienter ab ullo,
 28 nesciet his summam siquis abesse manum ;
 29 ablatum mediis opus est incudibus illud
 30 defuit et coeptis ultima lima meis,
 31 et veniam pro laude peto, laudatus abunde,
 32 non fastiditus si tibi, lector, ero.
 33 Hos quoque sex versus, in prima fronte libelli
 34 si praeponendos esse putabis, habe :
 35 "Orba parente suo quicumque volumina tangis,
 36 his saltem vestra detur in urbe locus ;
 37 quoque magis faveas, haec non sunt edita ab ipso,
 38 sed quasi de domini funere rapta sui.
 39 Quicquid in his igitur vitii rude carmen habebit,
 40 emendaturus, si licuisset, eram."

T1_8 v.1 In caput alta suum labentur ab aequore retro
 2 flumina, conversis Solque recurret equis,
 3 terra feret stellas, caelum findetur aratro,
 4 unda dabit flammam, et dabit ignis aquas,
 5 omnia naturae praepostera legibus ibunt,
 6 parsque suum mundi nulla tenebit iter,
 7 omnia jam fient, fieri quae posse negabam
 8 et nihil est de quo non sit habenda fides.
 9 Haec ego vaticinor, quia sum deceptus ab illo
 10 laturum misero quem mihi rebar opem.
 11 Tantane te, fallax, cepere obliviam nostri,
 12 adflictumque fuit tantus adire timor,
 13 ut neque respiceres nec solarere jacentem,
 14 dure, neque exequias prosequerere meas ?
 15 Illud amicitiae sanctum et venerabile nomen
 16 re tibi pro vili sub pedibusque jacet ?
 17 Quid fuit, ingenti prostratum mole sodalem
 18 visere et adloquii parte levare tui
 19 inque meos si non lacrimam demittere casus,
 20 pauca tamen ficto verba dolore pati
 21 idque, quod ignoti faciunt, vale dicere saltem,

22 et vocem populi publicaque ora sequi,
 23 denique lugubres vultus numquamque videndos
 24 cernere supremo dum licuitque die
 25 dicendumque semel toto non amplius aevo
 26 accipere et parili reddere voce "vale" ?
 27 At fecere alii nullo mihi foedere juncti
 28 et lacrimas animi signa dedere sui.
 29 Quid, nisi convictu causisque valentibus essem
 30 temporis et longi junctus amore tibi ?
 31 Quid, nisi tot lusus et tot mea seria nosses,
 32 tot nossem lusus seriaque ipse tua ?
 33 Quid, si dumtaxat Romae mihi cognitus esses,
 34 adscitus totiens in genus omne loci ?
 35 Cunctane in aequoreos abierunt irrita ventos ?
 36 Cunctane Lethaeis mersa feruntur aquis ?
 37 Non ego te genitum placida reor urbe Quirini,
 38 urbe meo quae jam non adeunda pede est,
 39 sed scopulis, Ponti quos haec habet ora sinistri,
 40 inque feris Scythiae Sarmaticisque jugis ;
 41 et tua sunt silicis circum praecordia venae,
 42 et rigidum ferri semina pectus habet ;
 43 quaeque tibi quondam tenero ducenda palato
 44 plena dedit nutrix ubera, tigris erat.
 45 Aut mala nostra minus quam nunc aliena putares,
 46 duritiaeque mihi non agerere reus.
 47 Sed quoniam accedit fatalibus hoc quoque damnis,
 48 ut careant numeris tempora prima suis,
 49 effice peccati ne sim memor hujus et illo
 50 officium laudem, quo queror, ore tuum.

T1_9

v.1 Detur inoffenso vitae tibi tangere metam
 2 qui legis hoc nobis non inimicus opus,
 3 atque utinam pro te possint mea vota valere,
 4 quae pro me duros non tetigere deos !
 5 Donec eris sospes, multos numerabis amicos :
 6 tempora si fuerint nubila, solus eris.
 7 Aspicias ut veniant ad candida tecta columbae,
 8 accipiat nullas sordida turris aves.
 9 Horrea formicae tendunt ad inania numquam ;
 10 nullus ad amissas ibit amicus opes.
 11 Utque comes radios per solis euntibus umbra est,
 12 cum latet hic pressus nubibus, illa fugit,
 13 mobile sic sequitur Fortunae lumina vulgus,
 14 quae simul inducta nocte teguntur, abit.
 15 Haec precor ut semper possint tibi falsa videri ;
 16 sunt tamen eventus vera fatenda meo.
 17 Dum stetimus, turbae quantum satis esset, habebat
 18 nota quidem, sed non ambitiosa domus ;
 19 at simul impulsus est, omnes timere ruinam
 20 cautaque communi terga dedere fugae.
 21 Saeva neque admiror metuunt si fulmina quorum
 22 ignibus adflari proxima quaeque solent.
 23 Sed tamen in duris remanentem rebus amicum
 24 quamlibet invisum Caesar in hoste probat
 25 nec solet irasci (neque enim moderatior alter)
 26 cum quis in adversis, si quid amavit, amat.

27 De comite Argolici postquam cognovit Orestae
 28 narratur Pyladen ipse probasse Thoas ;
 29 quae fuit Actoridae cum magno semper Achille,
 30 laudari solita est Hectoris ore fides ;
 31 quod pius ad Manes Theseus comes iret amico,
 32 Tartareum dicunt indoluisse deum ;
 33 Euryali Nisique fide tibi, Turne, relata
 34 credibile est lacrimis inaduisse genas.
 35 Est etiam in miseris pietas et in hoste probatur.
 36 Ei mihi, quam paucos haec mea dicta movent !
 37 Is status, haec rerum nunc est fortuna mearum
 38 debeat ut lacrimis nullus adesse modus.
 39 At mea sunt, proprio quamvis maestissima casu,
 40 pectora processu facta serena tuo.
 41 Hoc ego venturum jam tum, carissime, vidi,
 42 ferret adhuc istam cum minor aura ratem.
 43 Sive aliquod morum seu vitae labe carentis
 44 est pretium, nemo pluris emendus erat ;
 45 sive per ingenuas aliquis caput extulit artes,
 46 quaelibet eloquio fit bona causa tuo.
 47 His ego commotus dixi tibi protinus ipsi :
 48 "Scena manet dotes grandis, amice, tuas."
 49 Haec mihi non ovium fibrae tonitrusve sinistri
 50 linguave servatae pennave dixit avis.
 51 Augurium ratio est et conjectura futuri ;
 52 hac divinavi notitiamque tuli.
 53 Quae quoniam vera est, tota tibi mente mihique
 54 gratulor ingenium non latuisse tuum.
 55 At nostrum tenebris utinam latuisset in imis !
 56 Expediit studio lumen abesse meo,
 57 utque tibi prosunt artes, facunde, severae,
 58 dissimiles illis sic nocuere mihi.
 59 Vita tamen tibi nota mea est ; scis artibus illis
 60 auctoris mores abstinuisse sui ;
 61 scis vetus hoc juveni lusum mihi carmen et istos,
 62 ut non laudandos, sic tamen esse jocos.
 63 Ergo, ut defendi nullo mea posse colore,
 64 sic excusari crimina posse puto.
 65 Qua potes, excusa nec amici desere causam :
 66 quo bene coepisti, sic bene semper eas.

T1_10 v.1 Est mihi, sitque precor, flavae tutela Minervae,
 2 navis et a picta casside nomen habet.
 3 Sive opus est velis, minimam bene currit ad auram ;
 4 sive opus est remo, remige carpit iter.
 5 Nec comites volucris contenta est vincere cursu ;
 6 occupat egressas quamlibet ante rates.
 7 Et patitur fluctus fertque adsilientia longe
 8 aequora nec saevis victa madescit aquis.
 9 Illa Corinthiacis primum mihi cognita Cenchrus
 10 fida manet trepidae duxque comesque fugae ;
 11 perque tot eventus et iniquis concita ventis
 12 aequora Palladio numine tuta fuit.
 13 Nunc quoque tuta, precor, vasti secet ostia Ponti,
 14 quasque petit, Getici litoris intret aquas.
 15 Quae simul Aeoliae mare me deduxit in Helles

16 et longum tenui limite fecit iter,
 17 fleximus in laevum cursus et ab Hectoris urbe
 18 venimus ad portus, Imbria terra, tuos.
 19 Inde levi vento, Zerynthia litora nacta,
 20 Threiciam tetigit fessa carina Samon ;
 21 saltus ab hac contra brevis est Tempyra petenti.
 22 Hac dominum tenuis est illa secuta suum ;
 23 nam mihi Bistonios placuit pede carpere campos.
 24 Hellespontiacas illa relegit aquas
 25 Dardaniumque petit auctoris nomen habentem
 26 et te, ruricola Lampsace tuta deo,
 27 quodque per angustas vectae male virginis undas
 28 Seston Abydena separat urbe fretum,
 29 hincque Propontiacis haerentem Cyzicon oris,
 30 Cyzicon, Haemoniae nobile gentis opus,
 31 quaeque tenent Ponti Byzantia litora fauces :
 32 hic locus est gemini janua vasta maris.
 33 Hanc precor evincat propulsaque flatibus Austri
 34 transeat instabilis strenua Cyaneas
 35 Thyniacosque sinus et ab his per Apollinis urbem
 36 arta sub Anchiali moenia tendat iter.
 37 Inde Mesembriacos portus et Odeson et arces
 38 praetereat dictas nomine, Bacche, tuo,
 39 et quos Alcathoi memorant e moenibus ortos
 40 sedibus his profugos constituisse Larem ;
 41 a quibus adveniat Miletida sospes ad urbem,
 42 offensi quo me detulit ira dei !
 43 Haec si contigerint, merita cadet agna Minervae ;
 44 non facit ad nostras hostia major opes.
 45 Vos quoque, Tyndaridae, quos haec colit insula fratres,
 46 mite, precor, duplici numen adesse viae !
 47 Altera namque parat Symplegadas ire per artas,
 48 scindere Bistonias altera puppis aquas.
 49 Vos facite ut ventos, loca cum diversa petamus,
 50 illa suos habeat, nec minus illa suos !

T1_11 v.1 Littera quaecumque est toto tibi lecta libello,
 2 est mihi sollicito tempore facta viae.
 3 Aut haec me, gelido tremere cum mense Decembri,
 4 scribentem mediis Hadria vidit aquis,
 5 aut, postquam bimarem cursu superavimus Isthmon
 6 alteraque est nostrae sumpta carina fugae.
 7 Quod facerem versus inter fera murmura ponti,
 8 Cycladas Aegaeas obstupuisse puto.
 9 Ipse ego nunc miror tantis animique marisque
 10 fluctibus ingenium non cecidisse meum.
 11 Seu stupor huic studio sive est insania nomen,
 12 omnis ab hac cura levata mea est.
 13 Saepe ego nimborum dubius jactabar ab Haedis,
 14 saepe minax Steropes sidere pontus erat,
 15 fuscabatque diem custos Atlantidos Ursae,
 16 aut Hyadas seris hauserat Auster aquis ;
 17 saepe maris pars intus erat : tamen ipse trementi
 18 carmina ducebam qualiacumque manu.
 19 Nunc quoque contenti stridunt Aquilone rudentes,
 20 inque modum cumuli concava surgit aqua.

21 Ipse gubernator tollens ad sidera palmas
 22 exoscit votis inmemor artis opem.
 23 Quocumque aspexi, nihil est nisi mortis imago,
 24 quam dubia timeo mente timensque precor.
 25 Attigero portum, portu terrebor ab ipso :
 26 plus habet infesta terra timoris aqua.
 27 Nam simul insidiis hominum pelagique laboro
 28 et faciunt geminos ensis et unda metus :
 29 ille meo vereor ne speret sanguine praedam,
 30 haec titulum nostrae mortis habere velit.
 31 Barbara pars laeva est avidaeque adsueta rapinae,
 32 quam cruor et caedes bellaque semper habent,
 33 cumque sit hibernis agitatam fluctibus aequor,
 34 pectora sunt ipso turbidiora mari.
 35 Quo magis his debes ignoscere, candide lector,
 36 si spe sunt, ut sunt, inferiora tua.
 37 Non haec in nostris, ut quondam, scripsimus hortis,
 38 nec, consuete, meum, lectule, corpus habes.
 39 Jactor in indomito brumali luce profundo ;
 40 ipsaque caeruleis charta feritur aquis.
 41 Improba pugnat hiems indignaturque quod ausim
 42 scribere se rigidas incutiente minas.
 43 Vincat hiems hominem ; sed eodem tempore, quaeso,
 44 ipse modum statuam carminis, illa sui !

T2_1 v.1 Quid mihi vobiscum est, infelix cura, libelli,
 2 ingenio perii qui miser ipse meo ?
 3 Cur modo damnatas repeto, mea crimina, Musas ?
 4 An semel est poenam commeruisse parum ?
 5 Carmina fecerunt, ut me cognoscere vellet
 6 omine non fausto femina virque meo :
 7 carmina fecerunt ut me moresque notaret
 8 jam demi jussa Caesar ab Arte meos.
 9 Deme mihi studium, vitae quoque crimina demes.
 10 Acceptum refero versibus esse nocens.
 11 Hoc pretium curae vigilatorumque laborum
 12 cepimus : ingenio est poena reperta meo.
 13 Si saperem, doctas odissem jure sorores,
 14 numina cultori perniciose suo.
 15 At nunc (tanta meo comes est insania morbo !)
 16 saxa malum refero rursus ad ista pedem,
 17 scilicet ut victus repetit gladiator arenam
 18 et redit in tumidas naufraga puppis aquas.
 19 Forsitan, ut quondam Teuthrantia regna tenenti,
 20 sic mihi res eadem vulnus opemque feret,
 21 Musaque, quam movit, motam quoque leniet iram :
 22 exorant magnos carmina saepe deos.
 23 Ipse quoque Ausonias Caesar matresque nurusque
 24 carmina turrigerae dicere jussit Opi ;
 25 jusserat et Phoebos dici quo tempore ludos
 26 fecit quos aetas aspicit una semel.
 27 His, precor, exemplis tua nunc, mitissime Caesar,
 28 fiat ab ingenio mollior ira meo.
 29 Illa quidem justa est, nec me meruisse negabo

30 (non adeo nostro fugit ab ore pudor),
31 sed, nisi peccassem, quid tu concedere posses ?
32 Materiam veniae sors tibi nostra dedit.
33 Si, quotiens peccant homines, sua fulmina mittat
34 Juppiter, exiguo tempore inermis erit.
35 Nunc ubi detonuit strepituque exterruit orbem,
36 purum discussis aera reddit aquis.
37 Jure igitur genitorque deum rectorque vocatur,
38 jure capax mundus nil Jove majus habet.
39 Tu quoque, cum patriae rector dicare paterque,
40 utere more dei nomen habentis idem.
41 Idque facis nec te quisquam moderatius umquam
42 imperii potuit frena tenere sui.
43 Tu veniam parti superatae saepe dedisti,
44 non concessurus quam tibi victor erat.
45 Divitiis etiam multos et honoribus auctos
46 vidi qui tulerant in caput arma tuum ;
47 quaeque dies bellum, belli tibi sustulit iram ;
48 parsque simul templis utraque dona tulit ;
49 utque tuus gaudet miles, quod vicerit hostem,
50 sic victum cur se gaudeat hostis habet.
51 Causa mea est melior, qui nec contraria dicor
52 arma nec hostiles esse secutus opes.
53 Per mare, per terras, per tertia numina juro,
54 per te, praesentem conspicuumque deum,
55 hunc animum favisse tibi, vir maxime, meque,
56 qua sola potui, mente fuisse tuum.
57 Optavi peteres caelestia sidera tarde
58 parsque fui turbae parva precantis idem ;
59 et pia tura dedi pro te cumque omnibus unus
60 ipse quoque adjuvi publica vota meis.
61 Quid referam libros illos quoque, crimina nostra,
62 mille locis plenos nominis esse tui ?
63 Inspice majus opus, quod adhuc sine fine tenetur,
64 in non credendos corpora versa modos :
65 invenies vestri praeconia nominis illic,
66 invenies animi pignora multa mei.
67 Non tua carminibus major fit gloria nec quo,
68 ut major fiat, crescere possit, habet.
69 Fama Jovi superest : tamen hunc sua facta referri
70 et se materiam carminis esse juvat,
71 cumque Gigantei memorantur proelia belli,
72 credibile est laetum laudibus esse suis.
73 Te celebrant alii quanto decet ore tuasque
74 ingenio laudes uberiore canunt.
75 Sed tamen, ut fuso taurorum sanguine centum,
76 sic capitur minimo turis honore deus.
77 A ! ferus et nobis crudelior omnibus hostis,
78 delicias legit qui tibi cumque meas,
79 carmina ne nostris quae te venerantia libris
80 iudicio possint candidiore legi.
81 Esse sed irato quis te mihi posset amicus ?
82 Vix tunc ipse mihi non inimicus eram.
83 Cum coepit quassata domus subsidere, partes
84 in proclinatas omne recumbit onus ;
85 cunctaque fortuna rimam faciente dehiscunt,
86 ipsa suoque eadem pondere tracta ruunt.
87 Ergo hominum quaesitum odium mihi carmine, quosque

88 debut, est vultus turba secuta tuos.
89 At, memini, vitamque meam moresque probabas
90 illo, quem dederas, praetereuntis equo.
91 Quod si non prodest et honesti gratia nulla
92 redditur, at nullum crimen adeptus eram.
93 Nec male commissa est nobis fortuna reorum,
94 lisque decem deciens inspicienda viris.
95 Res quoque privatas statui sine crimine iudex,
96 deque mea fassa est pars quoque victa fide.
97 Me miserum ! potui, si non extrema nocerent,
98 iudicio tutus non semel esse tuo.
99 Ultima me perdunt imoque sub aequore mergit
100 incolumem totiens una procella ratem,
101 nec mihi pars nocuit de gurgite parva, sed omnes
102 pressere hoc fluctus Oceanusque caput.
103 Cur aliquid vidi ? cur noxia lumina feci ?
104 Cur imprudenti cognita culpa mihi ?
105 Inscius Actaeon vidit sine veste Dianam :
106 praeda fuit canibus non minus ille suis ;
107 scilicet in superis etiam fortuna luenda est
108 nec veniam laeso numine casus habet.
109 Illa nostra die, qua me malus abstulit error,
110 parva quidem periit, sed sine labe domus,
111 sic quoque parva tamen, patrio dicatur ut aevo
112 clara nec ullius nobilitate minor,
113 et neque divitiis nec paupertate notanda,
114 unde sit in neutrum conspiciendus eques.
115 Sit quoque nostra domus vel censu parva vel ortu,
116 ingenio certe non latet illa meo.
117 Quo videar quamvis nimium juvenaliter usus,
118 grande tamen toto nomen ab orbe fero
119 turbaque doctorum Nasonem novit et audet
120 non fastiditis adnumerare viris.
121 Corruit haec igitur Musis accepta, sub uno,
122 sed non exiguo crimine lapsa domus ;
123 atque ea sic lapsa est ut surgere, si modo laesi
124 ematuruerit Caesaris ira, queat.
125 Cujus in eventu poenae clementia tanta est
126 venerit ut nostro lenior illa metu.
127 Vita data est citraque necem tua constitit ira,
128 o princeps parce viribus use tuis.
129 Insuper accedunt te non adimente paternae,
130 tamquam vita parum muneris esset, opes.
131 Nec mea decreto damnasti facta senatus
132 nec mea selecto iudice iussa fuga est ;
133 tristibus invectus verbis (ita principe dignum)
134 ultus es offensas, ut decet, ipse tuas.
135 Adde quod edictum, quamvis immite minaxque,
136 attamen in poenae nomine lene fuit :
137 quippe relegatus, non exul dicor in illo
138 privaque fortunae sunt ibi verba meae.
139 Nulla quidem sano gravior mentisque potenti
140 poena est quam tanto displicuisse viro,
141 sed solet interdum fieri placabile numen ;
142 nube solet pulsa candidus ire dies.
143 Vidi ego pampineis oneratam vitibus ulmum
144 quae fuerat saevi fulmine tacta Jovis.
145 Ipse licet sperare vetes, sperabimus usque,

146 hoc unum fieri te prohibente potest.
 147 Spes mihi magna subit, cum te, mitissime princeps,
 148 spes mihi, respicio cum mea facta, cadit.
 149 Ac veluti ventis agitantibus aera non est
 150 aequalis rabies continuusque furor,
 151 sed modo subsidunt intermissique silesunt
 152 vimque putes illos deposuisse suam,
 153 sic abeunt redeuntque mei variantque timores
 154 et spem placandi dantque negantque tui.
 155 Per Superos igitur qui dent tibi longa dabuntque
 156 tempora, Romanum si modo nomen amant,
 157 per patriam quae te tuta et segura parente est,
 158 cujus, ut in populo, pars ego nuper eram,
 159 sic tibi, quem semper factis animoque mereris,
 160 reddatur gratae debitus Urbis amor !
 161 Livia sic tecum sociales compleat annos !
 162 Quae, nisi te, nullo conjuge digna fuit,
 163 quae si non esset, caelebs te vita deceret,
 164 nullaque, cui posses esse maritus, erat.
 165 Sospite sit tecum natus quoque sospes et olim
 166 inperium regat hoc cum seniore senex !
 167 Ut faciuntque tui, sidus juvenale, nepotes,
 168 per tua perque sui facta parentis eant !
 169 Sic adsueta tuis semper Victoria castris
 170 nunc quoque se praestet notaque signa petat,
 171 Ausoniumque ducem solitis circumvolet alis,
 172 ponat et in nitida laurea sarta coma,
 173 per quem bella geris, cuius nunc corpore pugnas,
 174 auspicium cui das grande deosque tuos,
 175 dimidioque tui praesens et respicis urbem,
 176 dimidio procul es saevaque bella geris
 177 hic tibi sic redeat superato victor ab hoste
 178 inque coronatis fulgeat altus equis !
 179 Parce, precor, fulmenque tuum, fera tela, reconde,
 180 heu ! nimium misero cognita tela mihi.
 181 Parce, pater patriae, nec nominis immemor hujus
 182 olim placandi spem mihi tolle tui !
 183 Non precor ut redeam, quamvis majora petitis
 184 credibile est magnos saepe dedisse deos ;
 185 mitius exilium si das propiusque roganti,
 186 pars erit ex poena magna levata mea.
 187 Ultima perpetior medios ejectus in hostes,
 188 nec quisquam patria longius exul abest.
 189 Solutus ad egressus missus septemplex Histri
 190 Parrhasiae gelido virginis axe premor.
 191 Ciziges et Colchi Metereaue turba Getaeque
 192 Danuvii mediis vix prohibentur aquis.
 193 Cumque alii causa tibi sint graviore fugati,
 194 ulterior nulli quam mihi terra data est ;
 195 longius hac nihil est, nisi tantum frigus et hostes,
 196 et maris adstricto quae coit unda gelu.
 197 Hactenus Euxini pars est Romana sinistri,
 198 proxima Bastarnae Sauromataeque tenent ;
 199 haec est Ausonio sub jure novissima vixque
 200 haeret in inperii margine terra tui.
 201 Unde precor supplex ut nos in tuta releges,
 202 ne sit cum patria pax quoque adempta mihi,
 203 ne timeam gentes, quas non bene summovet Hister,

204 neve tuus possim civis ab hoste capi ;
205 fas prohibet Latio quemquam de sanguine natum
206 Caesaribus salvis barbara vincla pati.
207 Perdiderint cum me duo crimina, carmen et error,
208 alterius facti culpa silenda mihi :
209 nam non sum tanti renovem ut tua vulnera, Caesar,
210 quem nimio plus est indoluisse semel.
211 Altera pars superest qua turpi carmine factus
212 arguor obsceni doctor adulterii.
213 Fas ergo est aliqua caelestia pectora falli,
214 et sunt notitia multa minora tua.
215 Utque deos caelumque simul sublime tuenti
216 non vacat exiguis rebus adesse Jovi,
217 de te pendentem sic dum circumspicis orbem,
218 effugiunt curas inferiora tuas.
219 Scilicet imperii princeps statione relicta
220 imparibus legeres carmina facta modis ?
221 Non ea te moles Romani nominis urget,
222 inque tuis umeris tam leve fertur onus
223 lusibus ut possis advertere numen ineptis,
224 excutiasque oculis otia nostra tuis.
225 Nunc tibi Pannonia est, nunc Illyris ora domanda ;
226 Rhaetica nunc praebent Thraciaeque arma metum ;
227 nunc petit Armenius pacem ; nunc porrigit arcus
228 Parthus eques timida captaque signa manu ;
229 nunc te prole tua juvenem Germania sentit
230 bellaque pro magno Caesare Caesar obit.
231 Denique, ut in tanto quantum non extitit umquam
232 corpore, pars nulla est quae labet imperii.
233 Urbs quoque te et legum lassat tutela tuarum
234 et morum, similes quos cupis esse tuis.
235 Non tibi contingunt quae gentibus otia praestas,
236 bellaque cum multis inrequieta geris.
237 Mirer in hoc igitur tantarum pondere rerum,
238 te numquam nostros evoluisse jocos ?
239 At si, quod mallet, vacuum tibi forte fuisset,
240 nullum legisses crimen in Arte mea.
241 Illa quidem fateor frontis non esse severae
242 scripta nec a tanto principe digna legi ;
243 non tamen idcirco legum contraria jussis
244 sunt ea Romanas erudiuntque nurus.
245 Neve quibus scribam possis dubitare libellos,
246 quattuor hos versus e tribus unus habet :
247 "Este procul, vittae tenues, insigne pudoris,
248 quaeque tegis medios instita longa pedes !
249 Nil nisi legitimum concessaque furta canemus,
250 inque meo nullum carmine crimen erit."
251 Ecquid ab hac omnes rigide summovimus Arte,
252 quas stola contingi vittaque sumpta vetat ?
253 - At matrona potest alienis artibus uti,
254 quoque trahat, quamvis non doceatur, habet-.
255 Nil igitur matrona legat, quia carmine ab omni
256 ad delinquendum doctior esse potest.
257 Quodcumque attigerit, si qua est studiosa sinistri,
258 ad vitium mores instruet inde suos :
259 sumpserit Annales (nihil est hirsutius illis),
260 facta sit unde parens Ilia nempe leget ;
261 sumpserit "Aeneadam genetrix" ubi prima, requiret

262 Aeneadam genetrix unde sit alma Venus.
 263 Persequar inferius, modo si licet ordine ferri,
 264 posse nocere animis carminis omne genus ;
 265 non tamen idcirco crimen liber omnis habebit :
 266 nil prodest quod non laedere possit idem.
 267 Igne quid utilius ? Si quis tamen urere tecta
 268 comparat, audaces instruit igne manus ;
 269 eripit interdum, modo dat medicina salutem ;
 270 quaeque juvet monstrat quaeque sit herba nocens.
 271 Et latro et cautus praecingitur ense viator :
 272 ille sed insidias, hic sibi portat opem ;
 273 discitur innocuas ut agat facundia causas :
 274 protegit haec sontes, inmeritosque premit.
 275 Sic igitur carmen, recta si mente legatur,
 276 constabit nulli posse nocere meum.
 277 "At quasdam vitio." Quicumque hoc concipit, errat,
 278 et nimium scriptis arrogat ille meis.
 279 Ut tamen hoc fatear, ludi quoque semina praebent
 280 nequitiae : tolli tota theatra jube !
 281 Peccandi causam multis quam saepe dederunt,
 282 Martia cum durum sternit harena solum.
 283 Tollatur Circus : non tuta licentia Circi est.
 284 Hic sedet ignoto juncta puella viro.
 285 Cum quaedam spatientur in hoc ut amator eodem
 286 conveniat, quare porticus ulla patet ?
 287 Quis locus est templis augustior ? haec quoque vitet,
 288 in culpam siqua est ingeniosa suam !
 289 Cum steterit Jovis aede, Jovis succurret in aede
 290 quam multas matres fecerit ille deus.
 291 Proxima adoranti Junonis templa subibit
 292 paelicibus multis hanc doluisse deam.
 293 Pallade conspecta, natum de crimine virgo
 294 sustulerit quare quaeret Erichthonium.
 295 Venerit in magni templum, tua munera, Martis :
 296 stat Venus Ultori juncta, vir ante fores ;
 297 Isidis aede sedens, cur hanc Saturnia quaeret
 298 egerit Ionio Bosphorioque mari.
 299 In Venerem Anchises, in Lunam Latmius heros,
 300 in Cererem Iasion qui referatur erit.
 301 Omnia perversas possunt corrumpere mentes :
 302 stant tamen illa suis omnia tuta locis.
 303 Et procul a scripta solis meretricibus Arte
 304 summovet ingenuas pagina prima manus.
 305 Quaecumque erupit, qua non sinit ire sacerdos,
 306 protinus huic dempti criminis ipsa rea est.
 307 Nec tamen est facinus versus evolvere molles ;
 308 multa licet castae non facienda legant.
 309 Saepe supercilii nudas matrona severi
 310 et Veneris stantis ad genus omne videt ;
 311 corpora Vestales oculi meretricia cernunt
 312 nec domino poenae res ea causa fuit.
 313 At cur in nostra nimia est lascivia Musa,
 314 curve meus cuiquam suadet amare liber ?
 315 Nil nisi peccatum manifesta que culpa fatenda est :
 316 paenitet ingenii iudicii que mei.
 317 Cur non, Argolicis potius quae concidit armis,
 318 vexata est iterum carmine Troja meo ?
 319 Cur tacui Thebas et vulnera mutua fratrum

320 et septem portas sub duce quamque suo ?
321 Nec mihi materiam bellatrix Roma negabat,
322 et pius est patriae facta referre labor.
323 Denique, cum meritis inpleveris omnia, Caesar,
324 pars mihi de multis una canenda fuit ;
325 utque trahunt oculos radiantia lumina solis,
326 traxissent animum sic tua facta meum.
327 Arguor inmerito. Tenuis mihi campus aratur ;
328 illud erat magnae fertilitatis opus.
329 Non ideo debet pelago se credere, si qua
330 audet in exiguo ludere cumba lacu.
331 Forsan et hoc dubitem numeris levioribus aptus
332 sim satis, in parvos sufficiamque modos.
333 At si me jubeas domitos Jovis igne Gigantes
334 dicere, conantem debilitabit onus.
335 Divitis ingenii est inmania Caesaris acta
336 condere, materia ne superetur opus.
337 Et tamen ausus eram, sed detractare videbar,
338 quodque nefas, damno viribus esse tuis.
339 Ad leve rursus opus, juvenalia carmina, veni
340 et falso movi pectus amore meum.
341 Non equidem vellem, sed me mea fata trahebant,
342 inque meas poenas ingeniosus eram.
343 Et mihi, quid didici ? cur me docuere parentes
344 litteraque est oculos ulla morata meos ?
345 Haec tibi me invisum lascivia fecit ob Artes
346 quas ratus es vetitos sollicitare toros.
347 Sed neque me nuptae didicerunt furta magistro,
348 quodque parum novit, nemo docere potest.
349 Sic ego delicias et mollia carmina feci,
350 strinxerit ut nomen fabula nulla meum ;
351 nec quisquam est adeo media de plebe maritus
352 ut dubius vitio sit pater ille meo.
353 Crede mihi, distant mores a carmine nostro
354 (vita verecunda est, Musa jocosa mea)
355 magnaue pars mendax operum est et ficta meorum :
356 plus sibi permisit compositore suo.
357 Nec liber indicium est animi, sed honesta voluntas
358 plurima mulcendis auribus apta ferens.
359 Accius esset atrox, conviva Terentius esset,
360 essent pugnaces qui fera bella canunt.
361 Denique composui teneros non solus amores :
362 composito poenas solus amore dedi.
363 Quid nisi cum multo Venerem confundere vino
364 praecepit lyrici Teia Musa senis ?
365 Lesbia quid docuit Sappho nisi amare puellas ?
366 Tuta tamen Sappho, tutus et ille fuit.
367 Nec tibi, Battiade, nocuit quod saepe legenti
368 delicias versu fassus es ipse tuas.
369 Fabula jucundi nulla est sine amore Menandri,
370 et solet hic pueris virginibusque legi.
371 Ilias ipsa quid est aliud, nisi adultera de qua
372 inter amatorem pugna virumque fuit ?
373 Quid prius est illi flamma Briseidos utque
374 fecerit iratos rapta puella duces ?
375 Aut quid Odyssea est nisi femina propter amorem,
376 dum vir abest, multis una petita viris ?
377 Quis nisi Maeonides Venerem Martemque ligatos

378 narrat, in obsceno corpora prensa toro ?
 379 Unde nisi indicio magni sciremus Homeri
 380 hospitis igne duas incaluisse deas ?
 381 Omne genus scripti gravitate tragoedia vincit :
 382 haec quoque materiam semper amoris habet.
 383 Num quid in Hippolyto nisi caecae flamma novercae ?
 384 Nobilis est Canace fratris amore sui.
 385 Quid ? non Tantalides agitante Cupidine currus
 386 Pisaeam Phrygiis vexit eburnus equis ?
 387 Tingeret ut ferrum natorum sanguine mater,
 388 concitus a laeso fecit amore dolor.
 389 Fecit amor subitas volucres cum paelice regem
 390 quaeque suum luget nunc quoque mater Ityn.
 391 Si non Aeropen frater sceleratus amasset,
 392 aversos Solis non legeremus equos.
 393 Impia nec tragicos tetigisset Scylla cothurnos,
 394 ni patrium crinem desecuisset amor.
 395 Qui legis Electran et egentem mentis Oresten,
 396 Aegisthi crimen Tyndaridosque legis.
 397 Nam quid de tetrico referam domitore Chimaerae,
 398 quem leto fallax hospita paene dedit ?
 399 Quid loquar Hermionen, quid te, Schoeneia virgo,
 400 teque, Mycenaeano Phoebas amata duci ?
 401 Quid Danaen Danaesque nurum matremque Lyaei
 402 Haemonaque et noctes cui coiere duae ?
 403 Quid Peliae generum, quid Thesea, quive Pelasgum
 404 Iliacam tetigit de rate primus humum ?
 405 Huc Iole Pyrrhique parens, huc Herculis uxor,
 406 huc accedat Hylas Iliacusque puer.
 407 Tempore deficiat, tragicos si persequar ignes,
 408 vixque meus capiet nomina nuda liber.
 409 Est et in obscenos commixta tragoedia risus,
 410 multaque praeteriti verba pudoris habet.
 411 Nec nocet auctori mollem qui fecit Achillem
 412 infregisse suis fortia facta modis.
 413 Junxit Aristides Milesia crimina secum,
 414 pulsus Aristides nec tamen urbe sua est.
 415 Nec qui descripsit corrumpi semina matrum,
 416 Eubius, impurae conditor historiae,
 417 nec qui composuit nuper Sybaritica fugit,
 418 nec qui concubitus non tacuere suos.
 419 Suntque ea doctorum monumentis mixta virorum,
 420 muneribusque ducum publica facta patent.
 421 Neve peregrinis tantum defendar ab armis,
 422 et Romanus habet multa jocosa liber,
 423 utque suo Martem cecinit gravis Ennius ore,
 424 Ennius ingenio maximus, arte rudis,
 425 explicat ut causas rapidi Lucretius ignis,
 426 casurumque triplex vaticinatur opus,
 427 sic sua lascivo cantata est saepe Catullo
 428 femina, cui falsum Lesbia nomen erat ;
 429 nec contentus ea, multos vulgavit amores,
 430 in quibus ipse suum fassus adulterium est.
 431 Par fuit exigui similisque licentia Calvi,
 432 detexit variis qui sua furta modis.
 433 Quid referam Ticideae, quid Memmi carmen, apud quos
 434 rebus adest nomen nominibusque pudor ?
 435 Cinna quoque his comes est Cinnaque procacior Anser

436 et leve Cornifici parque Catonis opus,
437 et quorum libris modo dissimulata Perillae
438 nomine, nunc legitur dicta, Metelle, tuo.
439 Is quoque Phasiacas Argon qui duxit in undas,
440 non potuit Veneris furta tacere suae.
441 Nec minus Hortensi nec sunt minus improba Servi
442 carmina : quis dubitet nomina tanta sequi ?
443 Vertit Aristiden Sisenna nec obfuit illi
444 historiae turpis inseruisse jocos ;
445 non fuit opprobrio celebrasse Lycorida Gallo,
446 sed linguam nimio non tenuisse mero.
447 Credere juranti durum putat esse Tibullus,
448 sic etiam de se quod neget illa viro.
449 Fallere custodes idem docuisse fatetur
450 seque sua miserum nunc ait arte premi.
451 Saepe velut gemmam dominae signumve probaret,
452 per causam meminit se tetigisse manum.
453 Utque refert, digitis saepe est nutuque locutus
454 et tacitam mensae duxit in orbe notam,
455 et quibus e sucis abeat de corpore livor
456 inpresso fieri qui solet ore docet.
457 Denique ab incauto nimium petit ille marito
458 se quoque uti servet, peccet ut illa minus.
459 Scit cui latretur, cum solus obambulet ipse,
460 cui totiens clausas excreet ante fores,
461 multaque dat furti talis praecepta docetque
462 qua nuptae possint fallere ab arte viros ;
463 non fuit hoc illi fraudi legiturque Tibullus
464 et placet, et jam te principe notus erat.
465 Invenies eadem blandi praecepta Properti,
466 destructus minima nec tamen ille nota est.
467 His ego successi, quoniam praestantia candor
468 nomina vivorum dissimulare jubet.
469 Non timui, fateor, ne, qua tot iere carinae,
470 naufraga servatis omnibus una foret.
471 Sunt aliis scriptae quibus alea luditur artes
472 (hoc est ad nostros non leve crimen avos),
473 quid valeant tali, quo possis plurima jactu
474 figere damnosos effugasve canes,
475 tessera quos habeat numeros, distante vocato
476 mittere quo deceat, quo dare missa modo,
477 discolor ut recto grassetur limite miles,
478 cum medius gemino calculus hoste perit,
479 ut mage velle sequens sciat et revocare priorem
480 nec tuto fugiens incommitatus eat,
481 parva sit ut ternis instructa tabella lapillis
482 in qua vicisse est continuasse suos,
483 quique alii lusus (neque enim nunc persequar omnes)
484 perdere, rem caram, tempora nostra solent.
485 Ecce canit formas alius jactusque pilarum,
486 hic artem nandi praecipit, ille trochi ;
487 composita est aliis fucandi cura coloris ;
488 hic epulis leges hospitioque dedit ;
489 alter humum de qua fingantur pocula monstrat
490 quaeque docet liquido testa sit apta mero.
491 Talia luduntur fumoso mense Decembri,
492 quae damno nulli composuisse fuit.
493 His ego deceptus non tristia carmina feci,

494 sed tristis nostros poena secuta jocos.
 495 Denique nec video tot de scribentibus unum
 496 quem sua perdiderit Musa : repertus ego.
 497 Quid, si scripsissem mimos obscena jocantes
 498 qui semper vetiti crimen amoris habent,
 499 in quibus assidue cultus procedit adulter
 500 verbaque dat stulto callida nupta viro ?
 501 Nubilis hos virgo matronaque virque puerque
 502 spectat, et ex magna parte senatus adest.
 503 Nec satis incestis temerari vocibus aures,
 504 adsuescunt oculi multa pudenda pati ;
 505 cumque fefellit amans aliqua novitate maritum,
 506 plauditur et magno palma favore datur.
 507 Quoque minus prodest, scaena est lucrosa poetae,
 508 tantaque non parvo crimina praetor emit.
 509 Inspice ludorum sumptus, Auguste, tuorum
 510 empta tibi magno talia multa leges.
 511 Haec tu spectasti spectandaque saepe dedisti
 512 (majestas adeo comis ubique tua est !)
 513 luminibusque tuis, totus quibus utitur orbis,
 514 scenica vidisti lentus adulteria.
 515 Scribere si fas est imitantes turpia mimos,
 516 materiae minor est debita poena meae.
 517 An genus hoc scripti faciunt sua pulpita tutum,
 518 quodque licet, mimis scena licere dedit ?
 519 Et mea sunt populo saltata poemata saepe,
 520 saepe oculos etiam detinuere tuos.
 521 Scilicet in domibus nostris ut prisca virorum
 522 artificis fulgent corpora picta manu,
 523 sic, quae concubitus varios Venerisque figuras
 524 exprimat, est aliquo parva tabella loco ;
 525 utque sedet vultu fassus Telamonius iram
 526 inque oculis facinus barbara mater habet,
 527 sic madidos siccat digitis Venus uda capillos
 528 et modo maternis tecta videtur aquis.
 529 Bella sonant alii telis instructa cruentis,
 530 parsque tui generis, pars tua facta canunt.
 531 Invida me spatium natura coercuit arto,
 532 ingenio vires exiguasque dedit.
 533 Et tamen ille tuae felix Aeneidos auctor
 534 contulit in Tyrios arma virumque toros,
 535 nec legitur pars ulla magis de corpore toto,
 536 quam non legitimo foedere junctus amor.
 537 Phyllidis hic idem teneraeque Amaryllidis ignes
 538 bucolicis juvenis luserat ante modis.
 539 Nos quoque jam pridem scripto peccavimus isto :
 540 supplicium patitur non nova culpa novum ;
 541 carminaque edideram, cum te delicta notantem
 542 praeteriit totiens inrequietus eques.
 543 Ergo quae juvenis mihi non nocitura putavi
 544 scripta parum prudens, nunc nocuere seni.
 545 Sera redundavit veteris vindicta libelli,
 546 distat et a meriti tempore poena sui.
 547 Ne tamen omne meum credas opus esse remissum,
 548 saepe dedi nostrae grandia vela rati.
 549 Sex ego Fastorum scripsi totidemque libellos,
 550 cumque suo finem mense volumen habet,
 551 idque tuo nuper scriptum sub nomine, Caesar,

552 et tibi sacratum sors mea rupit opus.
 553 Et dedimus tragicis scriptum regale cothurnis,
 554 quaeque gravis debet verba cothurnus habet,
 555 dictaque sunt nobis, quamvis manus ultima coeptis
 556 defuit, in facies corpora versa novas.
 557 Atque utinam revoces animum paulisper ab ira,
 558 et vacuo jubeas hinc tibi pauca legi
 559 pauca quibus prima surgens ab origine mundi
 560 in tua deduxi tempora, Caesar, opus !
 561 Aspicias quantum dederis mihi pectoris ipse
 562 quoque favore animi teque tuosque canam.
 563 Non ego mordaci destrinxi carmine quemquam,
 564 nec meus ullius crimina versus habet.
 565 Candidus a salibus suffusis felle refugi :
 566 nulla venenato littera mixta joco est.
 567 Inter tot populi, tot scriptis, milia nostri,
 568 quem mea Calliope laeserit unus ero.
 569 Non igitur nostris ullum gaudere Quiritem
 570 auguror, at multos indoluisse malis ;
 571 nec mihi credibile est quemquam insultasse jacenti,
 572 gratia candori si qua relata meo est.
 573 His precor atque aliis possint tua numina flecti,
 574 o pater, o patriae cura salusque tuae,
 575 non ut in Ausoniam redeam, nisi forsitan olim,
 576 cum longo poenae tempore victus eris,
 577 tutius exilium pauloque quietius oro,
 578 ut par delicto sit mea poena suo.

T3_1 v.1 "Missus in hanc venio timide liber exulis urbem :
 2 da placidam fesso, lector amice, manum
 3 neve reformida ne sim tibi forte pudori !
 4 Nullus in hac charta versus amare docet.
 5 Haec domini fortuna mei est ut debeat illam
 6 infelix nullis dissimulare jocis.
 7 Id quoque, quod viridi quondam male lusit in aevo,
 8 heu ! nimium sero damnat et odit opus.
 9 Inspice quid portem : nihil hic nisi triste videbis,
 10 carmine temporibus conveniente suis.
 11 Clauda quod alterno subsidunt carmina versu,
 12 vel pedis hoc ratio, vel via longa facit.
 13 Quod neque sum cedro flavus nec pumice levis,
 14 erubui domino cultior esse meo.
 15 Littera suffusas quod habet maculosa lituras,
 16 laesit opus lacrimis ipse poeta suum.
 17 Siqua videbuntur casu non dicta Latine,
 18 in qua scribebat, barbara terra fuit.
 19 Dicite, lectores, si non grave, qua sit eundum,
 20 quasque petam sedes hospes in urbe liber."
 21 Haec ubi sum furtim lingua titubante locutus,
 22 qui mihi monstraret, vix fuit unus, iter :
 23 "Di tibi dent, nostro quod non tribuere poetae,
 24 molliter in patria vivere posse tua !
 25 Duc age ! namque sequar, quamvis terraque marique

26 longinquo referam lassus ab orbe pedem."
 27 Paruit et ducens : "Haec sunt fora Caesaris, inquit,
 28 haec est a sacris quae via nomen habet ;
 29 hic locus est Vestae, qui Pallada servat et ignem ;
 30 haec fuit antiqui regia parva Numae."
 31 Inde petens dextram : "Porta est, ait, ista Palati,
 32 hic Stator, hoc primum condita Roma loco est."
 33 Singula dum miror, video fulgentibus armis
 34 conspicuos postes tectaque digna deo
 35 et "Jovis haec, dixi, domus est ?" Quod ut esse putarem,
 36 augurium menti querna corona dabat.
 37 Cujus ut accepi dominum : "Non fallimur, inquam,
 38 et magni verum est hanc Jovis esse domum.
 39 Cur tamen opposita velatur janua lauro,
 40 cingit et augustas arbor opaca fores ?
 41 Num quia perpetuos meruit domus ista triumphos ?
 42 An quia Leucadio semper amata deo est ?
 43 Ipsane quod festa est an quod facit omnia festa ?
 44 Quam tribuit terris, pacis an ista nota est ?
 45 Utque viret semper laurus nec fronde caduca
 46 carpitur, aeternum sic habet illa decus ?
 47 Causa superpositae scripto est testata coronae :
 48 servatos civis indicat hujus ope.
 49 Adice servatis unum, pater optime, civem
 50 qui procul extremo pulsus in orbe latet,
 51 in quo poenarum quas se meruisse fatetur
 52 non facinus causam, sed suus error habet.
 53 Me miserum ! vereorque locum vereorque potentem,
 54 et quatitur trepido littera nostra metu.
 55 Aspicis exsanguis chartam pallere colore ?
 56 Aspicis alternos intremuisse pedes ?
 57 Quandocumque, precor, nostro placere parenti
 58 isdem et sub dominis aspiciare, domus !"
 59 Inde tenore pari gradibus sublimia celsis
 60 ducor ad intonsi candida templa dei,
 61 signa peregrinis ubi sunt alterna columnis
 62 Belides et stricto barbarus ense pater,
 63 quaeque viri docto veteres cepere novique
 64 pectore lecturis inspicienda patent.
 65 Quaerebam fratres exceptis scilicet illis
 66 quos suus optaret non genuisse pater ;
 67 quaerentem frustra custos e sedibus illis
 68 praepositus sancto jussit abire loco.
 69 Altera templa peto, vicino juncta theatro :
 70 haec quoque erant pedibus non adeunda meis.
 71 Nec me, quae doctis patuerunt prima libellis,
 72 atria Libertas tangere passa sua est.
 73 In genus auctoris miseri fortuna redundat,
 74 et patimur nati quam tulit ipse fugam.
 75 Forsitan et nobis olim minus asper et illi,
 76 evictus longo tempore Caesar erit.
 77 Di, precor, atque adeo (neque enim mihi turba roganda est)
 78 Caesar, ades voto, maxime dive, meo !
 79 Interea, quoniam statio mihi publica clausa est,
 80 privato liceat delituisse loco.
 81 Vos quoque, si fas est, confusa pudore repulsae
 82 sumite, plebeiae, carmina nostra, manus.

T3_2 v.1 Ergo erat in fatiſ Scythiam quoque viſere noſtris,
 2 quaeque Lycaonio terra ſub axe jacet !
 3 Nec voſ, Pierideſ, nec ſtirps Letoia, veſtro
 4 docta ſacerdoti turba tuliſtis opem.
 5 Nec mihi quod luſi vero ſine crimine prodeſt
 6 quodque magiſ vita Muſa jocata mea eſt ;
 7 plurima ſed pelago terraque pericula paſſum
 8 uſtuſ ab adſiduo frigore Pontuſ habet.
 9 Quique fugax rerum ſecuraque in otia natuſ,
 10 mollis et inpatiendſ ante laboriſ eram,
 11 ultima nunc patior, nec me mare portuſ orbuſ
 12 perdere diverſae nec potuere viae ;
 13 ſuffecitque malis animuſ : nam corpꝰ ab illo
 14 accepit vires vixque ferenda tulit.
 15 Dum tamen et terris dubiuſ jactabar et undiſ,
 16 fallebat curas aegraque corda labor ;
 17 ut via finita eſt et opuſ requievit eundiſ,
 18 et poenae telluſ eſt mihi tacta meae,
 19 nil niſi flere libet nec noſtro parcior imber
 20 lumine de verna quam nive manat aqua.
 21 Roma domuſque ſubit deſideriuſque locoruſ,
 22 quicquid et amiſſa reſtat in Urbe mei.
 23 Ei mihi, quod totiendſ noſtri pulſata ſepulcri
 24 janua ſub nullo tempore aperta fuit !
 25 Cur ego tot gladiuſ fugi totiendſque minata
 26 obruit infelix nulla procella caput ?
 27 Di, quuſ experior nimiuſ conſtanter iniquoſ,
 28 participes irae quuſ deuſ unuſ habet,
 29 exſtimulate, precor, ceſſantia fata meique
 30 interituſ clauſaſ eſſe vetate foreſ.

T3_3 v.1 Haec mea ſi caſu mirariſ epiſtula quare
 2 alteriuſ digitiſ ſcripta ſit, aeger eram.
 3 Aeger in extremiſ ignoti partibuſ orbis
 4 incertuſque meae paene ſalutiſ eram.
 5 Quem mihi nunc animuſ dira regione jacenti
 6 inter Sauromataſ eſſe Getaque putes ?
 7 Nec caelum patior, nec aquis adſuevimuſ iſtiſ,
 8 terraque neſcio quo non placet ipſa modo.
 9 Non domuſ apta ſatiſ, non hic cibꝰ utiliſ aegro,
 10 nulluſ Apollinea qui levet arte malum,
 11 non qui ſoletur, non qui labentia tarde
 12 tempora narrando fallat, amicuſ adeſt.
 13 Laſſuſ in extremiſ jaceo populisque lociſque,
 14 et ſubit adfecto nunc mihi quicquid abeſt.
 15 Omnia cum ſubeant, vinciſ tamen omnia, conjunx,
 16 et pluſ in noſtro pectore parte tenes.
 17 Te loquor abſentem, te vox mea nominat unam ;
 18 nulla venit ſine te nox mihi, nulla dieſ.
 19 Quin etiam ſic me dicunt aliena locutuſ
 20 ut foret amenti nomen in ore tuum.
 21 Si jam deficiam ſubpreſſaque lingua palato
 22 vix inſtillato reſtituenda mero,
 23 nuntiet huc aliquiſ dominam veniſſe, reſurgam,

24 spesque tui nobis causa vigoris erit.
25 Ergo ego sum dubius vitae, tu forsitan istic
26 jucundum nostri nescia tempus agis.
27 Non agis, adfirmo ; liquet hoc, carissima, nobis
28 tempus agi sine me non nisi triste tibi.
29 Si tamen implevit mea sors quos debuit annos
30 et mihi vivendi tam cito finis adest,
31 quantum erat, o magni, morituro parcere, divi,
32 ut saltem patria contumularer humo ?
33 Vel poena in tempus mortis dilata fuisset,
34 vel praecepisset mors properata fugam.
35 Integer hanc potui nuper bene reddere lucem :
36 exul ut occiderem nunc mihi vita data est.
37 Tam procul ignotis igitur moriemur in oris
38 et fient ipso tristia fata loco ;
39 nec mea consueto languescent corpora lecto,
40 depositum nec me qui fleat ullus erit ;
41 nec dominae lacrimis in nostra cadentibus ora
42 accedent animae tempora parva meae ;
43 nec mandata dabo, nec cum clamore supremo
44 labentes oculos condet amica manus,
45 sed sine funeribus caput hoc, sine honore sepulcri
46 indeploratum barbara terra teget.
47 Ecquid, ubi audieris, tota turbabere mente
48 et feries pavida pectora fida manu ?
49 Ecquid in has frustra tendens tua brachia partes
50 clamabis miseri nomen inane viri ?
51 Parce tamen lacerare genas nec scinde capillos !
52 non tibi nunc primum, lux mea, raptus ero.
53 Cum patriam amisi, tunc me periisse putato !
54 et prior et gravior mors fuit illa mihi.
55 Nunc, si forte potes (sed non potes, optima conjunx),
56 finitis gaude tot mihi morte malis.
57 Quod potes, extenua forti mala corde ferendo
58 ad quae jam pridem non rude pectus habes.
59 Atque utinam pereant animae cum corpore nostrae
60 effugiatque avidos pars mihi nulla rogos !
61 Nam si morte carens vacua volat altus in aura
62 spiritus et Samii sunt rata dicta senis,
63 inter Sarmaticas Romana vagabitur umbras
64 perque feros Manes hospita semper erit.
65 Ossa tamen facito parva referantur in urna :
66 sic ego non etiam mortuus exul ero.
67 Non vetat hoc quisquam : fratrem Thebana peremptum
68 supposuit tumulo rege vetante soror.
69 Atque ea cum foliis et amomi pulvere misce
70 inque suburbano condita pone solo,
71 quosque legat versus oculo properante viator
72 grandibus in tituli marmore caede notis :
73 "Hic ego qui jaceo tenerorum lusor amorum
74 ingenio perii Naso poeta meo.
75 At tibi qui transis ne sit grave, quisquis amasti,
76 dicere : Nasonis molliter ossa cubent."
77 Hoc satis in titulo est ; etenim majora libelli
78 et diuturna magis sunt monumenta mihi,
79 quos ego confido, quamvis nocuere, daturos
80 nomen et auctori tempora longa suo.
81 Tu tamen extincto feralia munera semper

82 deque tuis lacrimis umida sarta dato.
 83 Quamvis in cineres corpus mutaverit ignis,
 84 sentiet officium maesta favilla pium.
 85 Scribere plura libet, sed vox mihi fessa loquendo
 86 dictandi vires siccaque lingua negat.
 87 Accipe supremo dictum mihi forsitan ore,
 88 quod tibi qui mittit non habet ipse, "vale !"

T3_4 v.1 O mihi care quidem semper, sed tempore duro
 2 cognite, res postquam procubuere meae,
 3 usibus edocto si quicquam credis amico,
 4 vive tibi et longe nomina magna fuge.
 5 Vive tibi, quantumque potes praelustria vita :
 6 saevum praelustri fulmen ab igne venit.
 7 Nam quamquam soli possunt prodesse potentes,
 8 non prosit potius siquis obesse potest.
 9 Effugit hibernas demissa antemna procellas
 10 lataque plus parvis vela timoris habent.
 11 Aspicias ut summa cortex levis innatet unda,
 12 cum grave nexa simul retia mergat onus.
 13 Haec ego si monitor monitus prius ipse fuissem,
 14 in qua debebam forsitan Urbe forem.
 15 Dum tecum vixi, dum me levis aura ferebat,
 16 haec mea per placidas cumba cucurrit aquas.
 17 Qui cadit in plano (vix hoc tamen evenit ipsum),
 18 sic cadit ut tacta surgere possit humo.
 19 At miser Elpenor tecto delapsus ab alto
 20 occurrit regi debilis umbra suo.
 21 Quid fuit ut tutas agitaret Daedalus alas,
 22 Icarus inmensas nomine signet aquas ?
 23 Nempe quod hic alte, demissius ille volabat ;
 24 nam pennas ambo non habuere suas.
 25 Crede mihi, bene qui latuit bene vixit, et intra
 26 fortunam debet quisque manere suam.
 27 Non foret Eumedes orbus, si filius ejus
 28 stultus Achilleos non adamasset equos,
 29 nec natum in flamma vidisset, in arbore natas,
 30 cepisset genitor si Phaethonta Merops.
 31 Tu quoque formida nimium sublimia semper,
 32 propositique, precor, contrahe vela tui.
 33 Nam pede inoffenso spatium decurrere vitae
 34 dignus es et fato candidiore frui.
 35 Quae pro te ut voveam miti pietate mereris
 36 haesuraque fide tempus in omne mihi.
 37 Vidi ego te tali vultu mea fata gementem
 38 qualem credibile est ore fuisse meo.
 39 Nostra tuas vidi lacrimas super ora cadentes,
 40 tempore quas uno fidaque verba bibi.
 41 Nunc quoque submotum studio defendis amicum
 42 et mala vix ulla parte levanda levas.
 43 Vive sine invidia, mollesque inglorius annos
 44 exige, amicitias et tibi junge pares.
 45 Nasonis tui, quod adhuc non exulat unum,
 46 nomen ama ; Scythicus cetera Pontus habet.

T3_4B v.1 Proxima sideribus tellus Erymanthidos Ursae
 2 me tenet, adstricto terra perusta gelu.
 3 Bosphoros et Tanais superant Scythiaeque paludes
 4 vix satis et noti nomina pauca loci.
 5 Ulterius nihil est nisi non habitabile frigus.
 6 Heu ! quam vicina est ultima terra mihi !
 7 At longe patria est, longe carissima conjux,
 8 quicquid et haec nobis post duo dulce fuit.
 9 Sic tamen haec adsunt ut, quae contingere non est
 10 corpore, sint animo cuncta videnda meo.
 11 Ante oculos errant domus Urbsque et forma locorum
 12 acceduntque suis singula facta locis.
 13 Conjugis ante oculos sicut praesentis imago est ;
 14 illa meos casus ingravat, illa levat :
 15 ingravat hoc quod abest, levat hoc quod praestat amorem
 16 impositumque sibi firma tuetur onus.
 17 Vos quoque pectoribus nostris haeretis, amici,
 18 dicere quos cupio nomine quemque suo ;
 19 sed timor officium cautus compescit et ipsos
 20 in nostro poni carmine nolle puto.
 21 Ante volebatis gratique erat instar honoris
 22 versibus in nostris nomina vestra legi.
 23 Quod quoniam est anceps, intra mea pectora quemque
 24 alloquar et nulli causa timoris ero.
 25 Nec meus indicio latitantes versus amicos
 26 protrahet : occulte, siquis amavit, amet.
 27 Scite tamen, quamvis longe regione remotus
 28 absim, vos animo semper adesse meo.
 29 Et, qua quisque potest, aliqua mala nostra levate
 30 fidam projecto neve negate manum.
 31 Prospera sic maneat vobis fortuna nec umquam
 32 contacti simili sorte rogetis idem.

T3_5 v.1 Usus amicitiae tecum mihi parvus, ut illam
 2 non aegre posses dissimulare, fuit,
 3 nec me complexus vinclis propioribus esses
 4 nave mea vento, forsan, eunte suo ;
 5 ut cecidi cunctique metu fugere ruinam
 6 versaue amicitiae terga dedere meae,
 7 ausus es igne Jovis percussum tangere corpus
 8 et deploratae limen adire domus ;
 9 idque recens praestas nec longo cognitus usu
 10 quod veterum misero vix duo tresve mihi.
 11 Vidi ego confusos vultus visosque notavi
 12 osque madens fletu pallidiusque meo
 13 et lacrimas cernens in singula verba cadentes
 14 ore meo lacrimas, auribus illa bibi ;
 15 brachiaque accepi presso pendentia collo
 16 et singultatis oscula mixta sonis.
 17 Sum quoque, care, tuis defensus viribus absens
 18 (scis carum veri nominis esse loco),
 19 multa praeterea manifestaue signa favoris
 20 pectoribus teneo non abitura meis.
 21 Di tibi posse tuos tribuant defendere semper
 22 quos in materia prosperiore juves.

23 Si tamen interea quid in his ego perditus oris
 24 (quod te credibile est quaerere) quaeris agam,
 25 spe trahor exigua, quam tu mihi demere noli,
 26 tristia leniri numina posse dei.
 27 Seu temere exspecto, sive id contingere fas est,
 28 tu mihi, quod cupio, fas, precor, esse proba ;
 29 quaeque tibi linguae est facundia, confer in illud
 30 ut doceas votum posse valere meum.
 31 Quo quisque est major, magis est placabilis irae
 32 et faciles motus mens generosa capit.
 33 Corpora magnanimo satis est prostrasse leoni ;
 34 pugna suum finem, cum jacet hostis, habet.
 35 At lupus et turpes instant morientibus ursi
 36 et quaecumque minor nobilitate fera.
 37 Majus apud Trojam forti quid habemus Achille ?
 38 Dardanii lacrimas non tulit ille senis.
 39 Quae ducis Emathii fuerit clementia, Porus
 40 Dareique docent funeris exsequiae.
 41 Neve hominum referam flexas ad mitius iras,
 42 Junonis gener est qui prius hostis erat.
 43 Denique non possum nullam sperare salutem,
 44 cum poenae non sit causa cruenta meae.
 45 Non mihi quaerenti pessumdare cuncta petitem
 46 Caesareum caput est, quod caput orbis erat ;
 47 non aliquid dixit elatave lingua loquendo est
 48 lapsaque sunt nimio verba profana mero.
 49 Inscia quod crimen viderunt lumina plector,
 50 peccatumque oculos est habuisse meum.
 51 Non equidem totam possum defendere culpam,
 52 sed partem nostri criminis error habet.
 53 Spes igitur superest facturum ut molliat ipse
 54 mutati poenam condicione loci.
 55 Hos utinam nitidi Solis praenuntius ortus
 56 afferat admissio Lucifer albus equo.

T3_6 v.1 Foedus amicitiae nec vis, carissime, nostrae
 2 nec, si forte velis, dissimulare potes.
 3 Donec enim licuit, nec te mihi carior alter,
 4 nec tibi me tota junctior urbe fuit,
 5 isque erat usque adeo populo testatus, ut esset
 6 paene magis quam tu quamque ego notus, amor ;
 7 quique est in caris animi tibi candor amicis,
 8 cognitus est ipsi, quem colis, iste viro.
 9 Nil ita celabas ut non ego conscius essem
 10 pectoribusque dabas multa tegenda meis ;
 11 cuique ego narrabam secreti quicquid habebam
 12 excepto quod me perdidit unus eras.
 13 Id quoque si scisses, salvo fruerere sodali
 14 consilioque forem sospes, amice, tuo.
 15 Sed mea me in poenam nimirum fata trahebant :
 16 omne bonae claudent utilitatis iter.
 17 Sive malum potui tamen hoc vitare cavendo,
 18 seu ratio fatum vincere nulla valet,
 19 tu tamen, o nobis usu junctissime longo,
 20 pars desiderii maxima paene mei,
 21 sis memor et, si quas fecit tibi gratia vires,

22 illas pro nobis experiare rogo
 23 numinis ut laesi fiat mansuetior ira,
 24 mutatoque minor sit mea poena loco,
 25 idque ita, si nullum scelus est in pectore nostro
 26 principiumque mei criminis error habet.
 27 Nec breve nec tutum quo sint mea dicere casu
 28 lumina funesti conscia facta mali ;
 29 mensque reformidat, veluti sua vulnera, tempus
 30 illud, et admonitu fit novus ipse dolor,
 31 et quaecumque adeo possunt afferre pudorem,
 32 illa tegi caeca condita nocte decet.
 33 Nil igitur referam nisi me peccasse, sed illo
 34 praemia peccato nulla petita mihi
 35 stultitiamque meum crimen debere vocari,
 36 nomina si facto reddere vera velis.
 37 Quae si non ita sunt, alium quo longius absim
 38 quaere (suburbana est hic mihi terra) locum.

T3_7 v.1 Vade salutatum, subito perarata, Perillam
 2 littera, sermonis fida ministra mei.
 3 Aut illam invenies dulci cum matre sedentem
 4 aut inter libros Pieridasque suas.
 5 Quicquid aget, cum te scierit venisse, relinquet,
 6 nec mora, quid venias quidve, requiret, agam.
 7 Vivere me dices, sed sic ut vivere nolim,
 8 nec mala tam longa nostra levata mora,
 9 et tamen ad Musas, quamvis nocuere, reverti
 10 aptaque in alternos cogere verba pedes.
 11 Tu quoque, dic, studiis communibus ecquid inhaeres
 12 doctaque non patrio carmina more canis ?
 13 Nam tibi cum fatis mores natura pudicos
 14 et raras dotes ingeniumque dedit.
 15 Hoc ego Pegasidas deduxi primus ad undas,
 16 ne male fecundae vena periret aquae.
 17 Primus id aspexi teneris in virginis annis
 18 utque pater natae duxque comesque fui.
 19 Ergo si remanent ignes tibi pectoris idem,
 20 sola tuum vates Lesbia vincet opus.
 21 Sed vereor ne te mea nunc fortuna retardet
 22 postque meos casus sit tibi pectus iners.
 23 Dum licuit, tua saepe mihi, tibi nostra legebam,
 24 saepe tui iudex, saepe magister eram ;
 25 aut ego praebebam factis modo versibus aures,
 26 aut, ubi cessares, causa ruboris eram.
 27 Forsitan exemplo, quia me laesere libelli,
 28 tu quoque sis poenae fata secuta meae.
 29 Pone, Perilla, metum, tantummodo femina nulla
 30 neve vir a scriptis discat amare tuis !
 31 Ergo desidia remove, doctissima, causas
 32 inque bonas artes et tua sacra redi.
 33 Ista decens facies longis vitiabitur annis
 34 rugaque in antiqua fronte senilis erit,
 35 inicietque manum formae damnosa senectus,
 36 quae strepitus passu non faciente venit,
 37 cumque aliquis dicet : "Fuit haec formosa", dolebis
 38 et speculum mendax esse querere tuum.

39 Sunt tibi opes modicae, cum sis dignissima magnis,
 40 finge sed inmensis censibus esse pares ;
 41 nempe dat id quodcumque libet fortuna rapitque,
 42 Irus et est subito qui modo Croesus erat.
 43 Singula ne referam, nil non mortale tenemus
 44 pectoris exceptis ingenique bonis.
 45 En ego, cum caream patria vobisque domoque
 46 raptaque sint adimi quae potuere mihi,
 47 ingenio tamen ipse meo comitorque fruorque :
 48 Caesar in hoc potuit juris habere nihil.
 49 Quilibet hanc saevo vitam mihi finiat ense,
 50 me tamen extincto fama superstes erit,
 51 dumque suis victrix omnem de montibus orbem
 52 prospiciet domitum Martia Roma, legar.
 53 Tu quoque, quam studii maneat felicior usus,
 54 effuge venturos, qua potes usque, rogos !

T3_8 v.1 Nunc ego Triptolemi cuperem consistere curru,
 2 misit in ignotam qui rude semen humum ;
 3 nunc ego Medae vellem frenare dracones
 4 quos habuit fugiens arce, Corinthe, tua ;
 5 nunc ego jactandas optarem sumere pennas,
 6 sive tuas, Perseu, Daedale, sive tuas,
 7 ut tenera nostris cedente volatibus aura
 8 aspicerem patriae dulce repente solum
 9 desertaeque domus vultus memoresque sodales
 10 caraque praecipue conjugis ora meae.
 11 Stulte, quid haec frustra votis puerilibus optas
 12 quae non ulla tibi fertque feretque dies ?
 13 Si semel optandum est, Augusti numen adora
 14 et, quem sensisti, rite precare deum.
 15 Ille tibi pennasque potest currusque volucres
 16 tradere : det redditum, protinus ales eris.
 17 Si precer hoc (neque enim possum majora rogare),
 18 ne mea sint timeo vota modesta parum.
 19 Forsitan hoc olim, cum jam satiaverit iram,
 20 tum quoque sollicita mente rogandus erit.
 21 Quod minus interea est instar mihi muneris ampli,
 22 ex his me jubeat quolibet ire locis.
 23 Nec caelum nec aquae faciunt nec terra nec aerae,
 24 ei mihi, perpetuus corpora languor habet !
 25 Seu vitiant artus aegrae contagia mentis,
 26 sive mei causa est in regione mali,
 27 ut tetigi Pontum, vexant insomnia vixque
 28 ossa tegit macies nec juvat ora cibus ;
 29 quique per autumnum percussis frigore primo
 30 est color in foliis quae nova laesit hiems,
 31 is mea membra tenet, nec viribus allevor ullis,
 32 et numquam queruli causa doloris abest.
 33 Nec melius valeo, quam corpore, mente, sed aegra est
 34 utraque pars aequae binaque damna fero.
 35 Haeret et ante oculos veluti spectabile corpus
 36 astat fortunae forma legenda meae ;
 37 cumque locum moresque hominum cultusque sonumque
 38 cernimus, et qui sim qui fuerimque subit,
 39 tantus amor necis est, querar ut cum Caesaris ira

40 quod non offensas vindicet ense suas.
 41 At quoniam semel est odio civiliter usus,
 42 mutato levior sit fuga nostra loco.

T3_9 v.1 Hic quoque sunt igitur Graiae (quis crederet ?) urbes
 2 inter inhumanae nomina barbariae ;
 3 huc quoque Mileto missi venere coloni
 4 inque Getis Graias constituere domos.
 5 Sed vetus huic nomen, positaque antiquius urbe
 6 constat ab Absyrty caede fuisse loco.
 7 Nam rate quae cura pugnacis facta Minervae
 8 per non temptatas prima cucurrit aquas
 9 impia desertum fugiens Medea parentem
 10 dicitur his remos adplicuisse vadis.
 11 Quem procul ut vidit tumulo speculator ab alto,
 12 "Hospes, ait, nosco, Colchide, vela, venit !"
 13 Dum trepidant Minyae, dum solvitur aggere funis,
 14 dum sequitur celeres ancora tracta manus,
 15 conscia percussit meritorum pectora Colchis
 16 ausa atque ausura multa nefanda manu ;
 17 et, quamquam superest ingens audacia menti,
 18 pallor in attonitae virginis ore fuit.
 19 Ergo ubi prospexit venientia vela : "Tenemur
 20 et pater est aliqua fraude morandus", ait.
 21 Dum quid agat quaerit, dum versat in omnia vultus,
 22 ad fratrem casu lumina flexa tulit.
 23 Cujus ut oblata est praesentia : "Vicimus, inquit ;
 24 hic mihi morte sua causa salutis erit."
 25 Protinus ignari nec quicquam tale timentis
 26 innocuum rigido perforat ense latus
 27 atque ita divellit divulsaque membra per agros
 28 dissipat in multis invenienda locis
 29 (neu pater ignoret, scopulo proponit in alto
 30 pallentesque manus sanguineumque caput),
 31 ut genitor luctuque novo tardetur et, artus
 32 dum legit extinctos, triste moretur iter.
 33 Inde Tomis dictus locus hic, quia fertur in illo
 34 membra soror fratris consecuisse sui.

T3_10 v.1 Si quis adhuc istic meminit Nasonis adempti
 2 et superest sine me nomen in Urbe meum,
 3 subpositum stellis numquam tangentibus aequor
 4 me sciat in media vivere barbaria.
 5 Sauromatae cingunt, fera gens, Bessique Getaeque,
 6 quam non ingenio nomina digna meo !
 7 Dum tamen aura tepet, medio defendimur Histro :
 8 ille suis liquidis bella repellit aquis.
 9 At cum tristis hiems squalentia protulit ora,
 10 terraque marmoreo est candida facta gelu,
 11 dum parat et Boreas et nix habitare sub Arcto,
 12 tum patet has gentes axe tremente premi.
 13 Nix jacet, et jactam ne sol pluviaeque resolvant,
 14 indurat Boreas perpetuamque facit.
 15 Ergo ubi deliquit nondum prior, altera venit

16 et solet in multis bima manere locis ;
17 tantaque commoti vis est Aquilonis ut altas
18 aequet humo turre tectaque rapta ferat.
19 Pellibus et sutis arcent mala frigora braxis,
20 oraque de toto corpore sola patent.
21 Saepe sonant moti glacie pendente capilli,
22 et nitet inducto candida barba gelu ;
23 nudaque consistunt formam servantia testae
24 vina, nec hausta meri, sed data frustra bibunt.
25 Quid loquar, ut vincti concrecant frigore rivi
26 deque lacu fragiles effodiantur aquae ?
27 Ipse papyrifero qui non angustior amne
28 miscetur vasto multa per ora freto
29 caeruleos ventis latices durantibus Hister
30 congelat et tectis in mare serpit aquis ;
31 quaque rates ierant, pedibus nunc itur et undas
32 frigore concretas ungula pulsat equi ;
33 perque novos pontes subter labentibus undis
34 ducunt Sarmatici barbara plaustra boves.
35 Vix equidem credar, sed, cum sint praemia falsi
36 nulla, ratam debet testis habere fidem.
37 Vidimus ingentem glacie consistere pontum,
38 lubricaque inmotas testa premebat aquas.
39 Nec vidisse sat est, durum calcavimus aequor
40 undaque non udo sub pede summa fuit.
41 Si tibi tale fretum quondam, Leandre, fuisset,
42 non foret angustae mors tua crimen aquae.
43 Tum neque se pandi possunt delphines in auras
44 tollere - conantes dura coercet hiems -
45 et, quamvis Boreas jactatis insonet alis,
46 fluctus in obsessio gurgite nullus erit ;
47 inclusaeque gelu stabunt in marmore puppes,
48 nec poterit rigidas findere remus aquas.
49 Vidimus in glacie pisces haerere ligatos,
50 sed pars ex illis tum quoque viva fuit.
51 Sive igitur nimii Boreae vis saeva marinas,
52 sive redundatas flumine cogit aquas,
53 protinus aequato siccis Aquilonibus Histro
54 invehitur celeri barbarus hostis equo ;
55 hostis equo pollens longeque volante sagitta
56 vicinam late depopulatur humum.
57 Diffugiunt alii nullisque tuentibus agros
58 incustoditae diripiuntur opes,
59 ruris opes parvae, pecus et stridentia plaustra
60 et quas divitias incola pauper habet.
61 Pars agitur vinctis post tergum capta lacertis
62 respiciens frustra rura Laremque suum ;
63 pars cadit hamatis misere confixa sagittis,
64 nam volucris ferro tinctile virus inest.
65 Quae nequeunt secum ferre aut abducere perdunt
66 et cremat insontes hostica flamma casas.
67 Tunc quoque, cum pax est, trepidant formidine belli,
68 nec quisquam presso vomere sulcat humum.
69 Aut videt aut metuit locus hic quem non videt hostem ;
70 cessat iners rigido terra relicta situ.
71 Non hic pampinea dulcis latet uva sub umbra,
72 nec cumulant altos fervida musta lacus.
73 Poma negat regio, nec haberet Acontius in quo

74 scriberet hic dominae verba legenda suae.
 75 Aspiceres nudos sine fronde, sine arbore, campos :
 76 heu loca felici non adeunda viro !
 77 Ergo tam late pateat cum maximus orbis,
 78 haec est in poenam terra reperta meam.

T3_11 v.1 Si quis es, insultes qui casibus, improbe, nostris
 2 meque reum dempto fine cruentus agas,
 3 natus es e scopulis et pastus lacte ferino,
 4 et dicam silices pectus habere tuum.
 5 Quis gradus ulterior quo se tua porrigat ira
 6 restat ? quidve meis cernis abesse malis ?
 7 Barbara me tellus et inhospita litora Ponti
 8 cumque suo Borea Maenalis Ursa videt.
 9 Nulla mihi cum gente fera commercia linguae ;
 10 omnia solliciti sunt loca plena metus ;
 11 utque fugax avidis cervus deprensus ab ursis
 12 cinctave montanis ut pavet agna lupis,
 13 sic ego belligeris a gentibus undique saeptus
 14 terreor hoste meum paene premente latus.
 15 Utque sit exiguum poenae quod conjuge cara,
 16 quod patria careo pignoribusque meis,
 17 ut mala nulla feram nisi nudam Caesaris iram,
 18 nuda parum nobis Caesaris ira mali est ?
 19 Et tamen est aliquis qui vulnera cruda retractet,
 20 solvat et in mores ora diserta meos.
 21 In causa facili cuivis licet esse diserto
 22 et minimae vires frangere quassa valent.
 23 Subruere est arces et stantia moenia virtus :
 24 quamlibet ignavi praecipitata premunt.
 25 Non sum ego qui fueram. Quid inanem proteris umbram ?
 26 Quid cinerem saxi bustaque nostra petis ?
 27 Hector erat tunc cum bello certabat ; at idem
 28 vinctus ad Haemonios non erat Hector equos.
 29 Me quoque quem noras olim non esse memento ;
 30 ex illo superant haec simulacra viro.
 31 Quid simulacra, ferox, dictis incessis amaris ?
 32 Parce, precor, Manes sollicitare meos !
 33 Omnia vera puta mea crimina, nil sit in illis
 34 quod magis errorem quam scelus esse putes,
 35 pendimus en profugi (satia tua pectora) poenas
 36 exilioque graves exilique loco.
 37 Carnifici fortuna potest mea flenda videri :
 38 et tamen est uno iudice mersa parum.
 39 Saevior es tristi Busiride, saevior illo
 40 qui falsum lento torruit igne bovem,
 41 quique bovem Siculo fertur donasse tyranno
 42 et dictis artes conciliasse suas :
 43 "Munere in hoc, rex, est usus, sed imagine major,
 44 nec sola est operis forma probanda mei.
 45 Aspicias a dextra latus hoc adaperitile tauri ?
 46 Hac tibi quem perdes coniciendus erit.
 47 Protinus inclusum lentis carbonibus ure :
 48 mugiet, et veri vox erit illa bovis.
 49 Pro quibus inventis, ut munus munere penses,
 50 da, precor, ingenio praemia digna meo."

51 Dixerat, at Phalaris : "Poenae mirande repertor,
 52 ipse tuum praesens imbue, dixit, opus !"
 53 Nec mora, monstratis crudeliter ignibus ustus
 54 exhibuit geminos ore gemente sonos.
 55 Quid mihi cum Siculis inter Scythiamque Getasque ?
 56 Ad te, quisquis is es, nostra querela redit.
 57 Utque sitim nostro possis explere cruore,
 58 quantaque vis avido gaudia corde feras ;
 59 tot mala sum fugiens tellure, tot aequore passus
 60 te quoque ut auditis posse dolere putem.
 61 Crede mihi, si sit nobis collatus Ulixes,
 62 Neptunine minor quam Jovis ira fuit.
 63 Ergo quicumque es, rescindere crimina noli
 64 deque gravi duras vulnere tolle manus,
 65 utque meae famam tenuent obliviae culpae,
 66 facta cicatricem ducere nostra sine ;
 67 humanaeque memor sortis, quae tollit eosdem
 68 et premit, incertas ipse verere vices.
 69 Et quoniam, fieri quod numquam posse putavi,
 70 est tibi de rebus maxima cura meis,
 71 non est quod timeas : fortuna miserrima nostra est ;
 72 omne trahit secum Caesaris ira malum.
 73 Quod magis ut liqueat, neve hoc ego fingere credar,
 74 ipse velim poenas experiare meas.

T3_12 v.1 Frigora jam Zephyri minuunt, annoque peracto
 2 longior antiquis visa Maeotis hiems,
 3 impositamque sibi qui non bene pertulit Hellen
 4 tempora nocturnis aequa diurna facit.
 5 Jam violam puerique legunt hilaresque puellae
 6 rustica quae nullo nata serente venit,
 7 prataque pubescunt variorum flore colorum
 8 indocilique loquax gutture vernat avis ;
 9 utque malae matris crimen deponat hirundo,
 10 sub trabibus cunas tectaque parva facit ;
 11 herbaque, quae latuit Cerealibus obruta sulcis,
 12 exit et expandit molle cacumen humo ;
 13 quoque loco est vitis, de palmite gemma movetur :
 14 nam procul a Getico litore vitis abest ;
 15 quoque loco est arbor, turgescit in arbore ramus :
 16 nam procul a Geticis finibus arbor abest.
 17 Otia nunc istic, junctisque ex ordine ludis
 18 cedunt verbosi garrula bella fori.
 19 Usus equi nunc est, levibus nunc luditur armis,
 20 nunc pila, nunc celeri volvitur orbe trochus ;
 21 nunc ubi perfusa est oleo labente juvenus,
 22 defessos artus Virgine tingit aqua.
 23 Scena viget studiisque favor distantibus ardet,
 24 proque tribus resonant terna theatra foris.
 25 O quantum et quotiens non est numerare, beatum,
 26 non interdita cui licet Urbe frui !
 27 At mihi sentitur nix verno sole soluta,
 28 quaeque lacu durae non fodiantur aquae ;
 29 nec mare concrevit glacie nec, ut ante, per Histrum
 30 stridula Sauromates plaustra bubulcus agit.
 31 Incipient aliquae tamen huc adnare carinae

32 hospitaque in Ponti litore puppis erit.
 33 Sedulus occurram nautae, dictaque salute
 34 quid veniat quaeram quisve quibusve locis.
 35 Ille quidem mirum ni de regione propinqua
 36 non nisi vicinas tutus ararit aquas.
 37 Rarus ab Italia tantum mare navita transit,
 38 litora rarus in haec portubus orba venit.
 39 Sive tamen Graeca scierit, sive ille Latina
 40 voce loqui - certe gratior hujus erit -
 41 (fas quoque ab ore freti longaeque Propontidos undis
 42 huc aliquem certo vela dedisse Noto),
 43 quisquis is est, memori rumorem voce referre
 44 et fieri famae parsque gradusque potest.
 45 Is precor auditos possit narrare triumphos
 46 Caesaris et Latio reddita vota Jovi
 47 teque, rebellatrix, tandem, Germania, magni
 48 triste caput pedibus subposuisse ducis.
 49 Haec mihi qui referet, quae non vidisse dolebo,
 50 ille meae domui protinus hospes erit.
 51 Ei mihi ! jamne domus Scythico Nasonis in orbe est ?
 52 Jamque suum mihi dat pro Lare poena locum ?
 53 Di, facite ut Caesar non hic penetrabile domumque,
 54 hospitium poenae sed velit esse meae.

T3_13 v.1 Ecce supervacuus (quid enim fuit utile gigni ?)
 2 ad sua natalis tempora noster adest.
 3 Dure, quid ad miseros veniebas exulis annos ?
 4 Debueras illis imposuisse modum.
 5 Si tibi cura mei, vel si pudor ullus inesset,
 6 non ultra patriam me sequerere meam,
 7 quoque loco primum tibi sum male cognitus infans,
 8 illo temptasses ultimus esse mihi
 9 inque relinquendo, quod idem fecere sodales,
 10 tu quoque dixisses tristis in Urbe "Vale".
 11 Quid tibi cum Ponto ? Num te quoque Caesaris ira
 12 extremam gelidi misit in orbis humum ?
 13 Scilicet exspectas soliti tibi moris honorem,
 14 pendeat ex umeris vestis ut alba meis,
 15 fumida cingatur florentibus ara coronis
 16 micaque sollemni turis in igne sonet
 17 libaque dem proprie genitale notantia tempus
 18 concipiamque bonas ore favente preces ?
 19 Non ita sum positus, nec sunt ea tempora nobis
 20 adventu possim laetus ut esse tuo.
 21 Funeris ara mihi, ferali cincta cupressu
 22 convenit et structis flamma parata rogis.
 23 Nec dare tura libet nil exorantia divos,
 24 in tantis subeunt nec bona verba malis.
 25 Si tamen est aliquid nobis hac luce petendum,
 26 in loca ne redeas amplius ista, precor,
 27 dum me terrarum pars paene novissima, Pontus
 28 Euxinus falso nomine dictus, habet.

T3_14 v.1 Cultor et antistes doctorum sancte virorum,

2 quid facis, ingenio semper amice meo ?
 3 Ecquid, ut incolumem quondam celebrare solebas,
 4 nunc quoque ne videar totus abesse caves ?
 5 Conficis exceptis ecquid mea carmina solis
 6 artibus artificii quae nocuere suo ?
 7 Immo ita fac, quaeso, vatium studiose novorum,
 8 quaque potes, retine corpus in Urbe meum.
 9 Est fuga dicta mihi, non est fuga dicta libellis
 10 qui domini poenam non meruere sui.
 11 Saepe per externas profugus pater exulat oras,
 12 Urbe tamen natis exulis esse licet.
 13 Palladis exemplo de me sine matre creata
 14 carmina sunt ; stirps haec progeniesque mea est.
 15 Hanc tibi commendo quae, quo magis orba parente est,
 16 hoc tibi tutori sarcina major erit.
 17 Tres mihi sunt nati contagia nostra secuti ;
 18 cetera fac curae sit tibi turba palam.
 19 Sunt quoque mutatae, ter quinque volumina, formae,
 20 carmina de domini funere rapta sui.
 21 Illud opus potuit, si non prius ipse perissem,
 22 certius a summa nomen habere manu :
 23 nunc incorrectum populi pervenit in ora,
 24 in populi quicquam si tamen ore meum est.
 25 Hoc quoque nescio quid nostris appone libellis,
 26 diverso missum quod tibi ab orbe venit.
 27 Quod quicumque leget (si quis leget), aestimet ante
 28 compositum quo sit tempore quoque loco.
 29 Aequus erit scriptis quorum cognoverit esse
 30 exilium tempus barbariamque locum,
 31 inque tot adversis carmen mirabitur ullum
 32 ducere me tristi sustinuisse manu.
 33 Ingenium fregere meum mala cuius et ante
 34 fons infecundus parvaque vena fuit.
 35 Sed quaecumque fuit, nullo exercente refugit
 36 et longo periit arida facta situ.
 37 Non hic librorum per quos inviter alarque
 38 copia : pro libris arcus et arma sonant.
 39 Nullus in hac terra, recitem si carmina, cuius
 40 intellecturis auribus utar, adest ;
 41 non quo secedam locus est : custodia muri
 42 submovet infestos clausaque porta Getas.
 43 Saepe aliquid quaero verbum nomenque locumque,
 44 nec quisquam est a quo certior esse queam ;
 45 dicere saepe aliquid conanti (turpe fateri !)
 46 verba mihi desunt dididicique loqui.
 47 Threicio Scythicoque fere circumsonor ore
 48 et videor Geticis scribere posse modis.
 49 Crede mihi, timeo ne sint inmixta Latinis
 50 inque meis scriptis Pontica verba legas.
 51 Qualemcumque igitur venia dignare libellum,
 52 sortis et excusa condicione meae.

T4_1 v.1 Si qua meis fuerint, ut erunt, vitiosa libellis,
 2 excusata suo tempore, lector, habe.

3 Exul eram, requiesque mihi, non fama petita est,
 4 mens intenta suis ne foret usque malis.
 5 Hoc est cur cantet vinctus quoque compede fossor,
 6 indocili numero cum grave mollit opus.
 7 Cantat et innitens limosae pronus harenae,
 8 adverso tardam qui trahit amne ratem,
 9 quique refert pariter lentos ad pectora remos,
 10 in numerum pulsa brachia jactat aqua.
 11 Fessus ubi incubuit baculo saxove resedit
 12 pastor, harundineo carmine mulcet oves.
 13 Cantantis pariter, pariter data pensa trahentis
 14 fallitur ancillae decipiturque labor.
 15 Fertur et abducta Lyrneside tristis Achilles
 16 Haemonia curas attenuasse lyra.
 17 Cum traheret silvas Orpheus et dura canendo
 18 saxa, bis amissa conjuge maestus erat.
 19 Me quoque Musa levat Ponti loca jussa petentem ;
 20 sola comes nostrae perstitit illa fugae ;
 21 sola nec insidias inter nec militis ensem
 22 nec mare nec ventos barbariamque timet.
 23 Scit quoque, cum perii, quis me deceperit error,
 24 et culpam in facto, non scelus, esse meo,
 25 scilicet hoc ipso nunc aequa, quod obfuit ante,
 26 cum mecum juncti criminis acta rea est.
 27 Non equidem vellem, quoniam nocitura fuerunt,
 28 Pieridum sacris inposuisse manum.
 29 Sed nunc quid faciam ? vis me tenet ipsa sacrorum
 30 et carmen demens carmine laesus amo.
 31 Sic nova Dulichio lotos gustata palato
 32 illo quo nocuit grata sapore fuit.
 33 Sentit amans sua damna fere, tamen haeret in illis,
 34 materiam culpae persequiturque suae.
 35 Nos quoque delectant, quamvis nocuere, libelli,
 36 quodque mihi telum vulnera fecit, amo.
 37 Forsitan hoc studium possit furor esse videri,
 38 sed quiddam furor hic utilitatis habet :
 39 semper in obtutu mentem vetat esse malorum
 40 praesentis casus inmemoremque facit.
 41 Utque suum Bacche non sentit saucia vulnus,
 42 dum stupet Idaeis exululata modis,
 43 sic, ubi mota calent viridi mea pectora thyrso,
 44 altior humano spiritus ille malo est.
 45 Ille nec exilium, Scythici nec litora ponti,
 46 ille nec iratos sentit habere deos.
 47 Utque soporiferae biberem si pocula Lethes,
 48 temporis adversi sic mihi sensus abest.
 49 Jure deas igitur veneror mala nostra levantes,
 50 sollicitas comites ex Helicone fugae,
 51 et partim pelago, partim vestigia terra
 52 vel rate dignatas vel pede nostra sequi.
 53 Sint precor hae saltem faciles mihi ; namque deorum
 54 cetera cum magno Caesare turba facit,
 55 meque tot adversis cumulant quot litus harenas
 56 quotque fretum pisces ovaque piscis habet.
 57 Vere prius flores, aestu numerabis aristas,
 58 poma per autumnum frigoribusque nives
 59 quam mala quae toto patior jactatus in orbe,
 60 dum miser Euxini litora saeva peto.

61 Nec tamen, ut veni, levior fortuna malorum est :
 62 huc quoque sunt nostras fata secuta vias ;
 63 hic quoque cognosco natalis stamina nostri,
 64 stamina de nigro vellere facta mihi.
 65 Utque neque insidias capitisque pericula narrem,
 66 vera quidem, veri sed graviora fide,
 67 vivere quam miserum est inter Bessosque Getasque
 68 illum qui populi semper in ore fuit !
 69 Quam miserum est porta vitam muroque tueri
 70 vixque sui tutum viribus esse loci !
 71 Aspera militiae juvenis certamina fugi,
 72 nec nisi lusura movimus arma manu ;
 73 nunc senior gladioque latus scutoque sinistram,
 74 canitiem galeae subicioque meam.
 75 Nam dedit e specula custos ubi signa tumultus
 76 induimus trepida protinus arma manu.
 77 Hostis habens arcus inbutaque tela venenis
 78 saevus anhelanti moenia lustrat equo ;
 79 utque rapax pecudem quae se non texit ovili
 80 per sata, per silvas fertque trahitque lupus,
 81 sic, siquem nondum portarum saepe receptum
 82 barbarus in campis repperit hostis, habet :
 83 aut sequitur captus coniectaque vincula collo
 84 accipit aut telo virus habente perit.
 85 Hic ego sollicitae jaceo novus incola sedis :
 86 heu nimium fati tempora longa mei !
 87 Et tamen ad numeros antiquaque sacra reverti
 88 sustinet in tantis hospita Musa malis.
 89 Sed neque cui recitem quisquam est mea carmina nec qui
 90 auribus accipiat verba Latina suis.
 91 Ipse mihi (quid enim faciam ?) scriboque legoque,
 92 tutaque iudicio littera nostra meo est.
 93 Saepe tamen dixi : "Cui nunc haec cura laborat ?
 94 An mea Sauromatae scripta Getaeque legent ?"
 95 Saepe etiam lacrimae me sunt scribente profusae
 96 umidaque est fletu littera facta meo,
 97 corque vetusta meum, tamquam nova, vulnera novit,
 98 inque sinum maestae labitur imber aquae.
 99 Cum vice mutata qui sim fuerimque recordor
 100 et tulerit quo me casus et unde subit,
 101 saepe manus demens, studiis irata sibique,
 102 misit in arsuros carmina nostra rogos.
 103 Atque ita de multis quoniam non multa supersunt,
 104 cum venia facito, quisquis es, ista legas.
 105 Tu quoque non melius quam sunt mea tempora carmen,
 106 interdicta mihi, consule, Roma, boni.

T4_2 v.1 Jam fera Caesaribus Germania, totus ut orbis,
 2 victa potest flexo succubuisse genu,
 3 altaque velentur fortasse Palatia sertis,
 4 turaque in igne sonent inficiantque diem,
 5 candidaque adducta collum percussa securi
 6 victima purpureo sanguine pulset humum,
 7 donaque amicorum templis promissa deorum
 8 reddere victores Caesar uterque parent,
 9 et qui Caesareo juvenes sub nomine crescunt,

10 perpetuo terras ut domus illa regat ;
11 cumque bonis nuribus pro sospite Livia nato
12 munera det meritis saepe datura deis
13 et pariter matres et quae sine crimine castos
14 perpetua servant virginitate focos ;
15 plebs pia cumque pia laetetur plebe senatus,
16 parvaeque cujus eram pars ego nuper, eques.
17 Nos procul expulsos communia gaudia fallunt
18 famaque tam longe non nisi parva venit.
19 Ergo omnis populus poterit spectare triumphos
20 cumque ducum titulis oppida capta leget
21 vinclaque captiva reges cervice gerentes
22 ante coronatos ire videbit equos
23 et cernet vultus aliis pro tempore versos,
24 terribiles aliis inmemoresque sui.
25 Quorum pars causas et res et nomina quaeret,
26 pars referet, quamvis noverit illa parum :
27 "Hic qui Sidonio fulget sublimis in ostro
28 dux fuerat belli, proximus ille duci.
29 Hic qui nunc in humo lumen miserabile fixit
30 non isto vultu, cum tulit arma, fuit.
31 Ille ferox et adhuc oculis hostilibus ardens
32 hortator pugnae consiliumque fuit.
33 Perfidus hic nostros inclusit fraude locorum,
34 squalida promissis qui tegit ora comis.
35 Illo qui sequitur dicunt mactata ministro
36 saepe recusanti corpora capta deo.
37 Hic lacus, hi montes, haec tot castella, tot amnes
38 plena ferae caedis, plena cruoris erant.
39 Drusus in his meruit quondam cognomina terris,
40 quae bona progenies digna parente fuit.
41 Cornibus hic fractis viridi male tectus ab ulva
42 decolor ipse suo sanguine Rhenus erat.
43 Crinibus en etiam fertur Germania passis
44 et ducis invicti sub pede maesta sedet
45 collaque Romanae praebens animosa securi
46 vincula fert illa qua tulit arma manu."
47 Hos super in curru, Caesar, victore veheris
48 purpureus populi rite per ora tui,
49 quaque ibis, manibus circumplaudere tuorum
50 undique jactato flore tegente vias.
51 Tempora Phoebea lauro cingetur "io" que
52 miles "io" magna voce "trumphe" canet.
53 Ipse sono plausuque simul fremituque calentes
54 quadrijugos cernes saepe resistere equos.
55 Inde petes arcem et delubra faventia votis,
56 et dabitur merito laurea vota Jovi.
57 Haec ego submotus, qua possum, mente videbo :
58 erepti nobis jus habet illa loci.
59 Illa per immensas spatiatur libera terras,
60 in caelum celeri pervenit illa fuga ;
61 illa meos oculos mediam deducit in Urbem
62 immunes tanti nec sinit esse boni ;
63 invenietque animus qua currus spectet eburnos :
64 sic certe in patria per breve tempus ero.
65 Vera tamen capiet populus spectacula felix
66 laetaque erit praesens cum duce turba suo.
67 At mihi fingendo tantum longeque remotis

68 auribus hic fructus percipiendus erit,
 69 aque procul Latio diversum missus in orbem
 70 qui narret cupido vix erit ista mihi.
 71 Is quoque jam serum referet veteremque triumphum :
 72 quo tamen audiero tempore, laetus ero.
 73 Illa dies veniet mea qua lugubria ponam
 74 causaque privata publica major erit.

T4_3 v.1 Magna minorque ferae, quarum regis altera Graias,
 2 altera Sidonias, utraque sicca, rates,
 3 omnia cum summo positae videatis in axe
 4 et maris occiduas non subeatis aquas
 5 aetheriamque suis cingens amplexibus arcem
 6 vester ab intacta circulus extet humo,
 7 aspiciate illa, precor, quae non bene moenia quondam
 8 dicitur Iliades transiluisse Remus,
 9 inque meam nitidos dominam convertite vultus,
 10 sitque memor nostri necne referte mihi.
 11 Ei mihi, cur timeam ? Quae sunt manifesta requiro.
 12 Cur jacet ambiguo spes mea mixta metu ?
 13 Crede quod est et vis, ac desine tuta vereri,
 14 deque fide certa sit tibi certa fides,
 15 quodque polo fixae nequeunt tibi dicere flammae,
 16 non mentitura tu tibi voce refer :
 17 esse tui memorem, de qua tibi maxima cura est,
 18 quodque potest, secum nomen habere tuum.
 19 Vultibus illa tuis tamquam praesentis inhaeret
 20 teque remota procul, si modo vivit, amat.
 21 Ecquid, ubi incubuit justo mens aegra dolori,
 22 lenis ab admonito pectore somnus abit ?
 23 Tunc subeunt curae, dum te lectusque locusque
 24 tangit et oblitam non sinit esse mei,
 25 et veniunt aestus, et nox immensa videtur
 26 fessaque jactati corporis ossa dolent ?
 27 Non equidem dubito quin haec et cetera fiant
 28 detque tuus maesti signa doloris amor,
 29 nec cruciere minus quam cum Thebana cruentum
 30 Hectors Thessalico vidit ab axe rapi.
 31 Quid tamen ipse precer dubito, nec dicere possum
 32 affectum quem te mentis habere velim.
 33 Tristis es ? Indignor quod sim tibi causa doloris.
 34 Non es ? Ut amisso conjugae digna fores !
 35 Tu vero tua damna dole, mitissima conjunx,
 36 tempus et a nostris exige triste malis
 37 fleque meos casus : est quaedam flere voluptas ;
 38 expletur lacrimis egeriturque dolor.
 39 Atque utinam lugenda tibi non vita, sed esset
 40 mors mea : morte fores sola relicta mea !
 41 Spiritus hic per te patrias exisset in auras,
 42 sparsissent lacrimae pectora nostra piaae,
 43 supremoque die notum spectantia caelum
 44 texissent digiti lumina nostra tui,
 45 et cinis in tumulo positus jacuisset avito,
 46 tactaque nascenti corpus haberet humus ;
 47 denique, ut et vixi, sine crimine mortuus essem.
 48 Nunc mea supplicio vita pudenda suo est.

49 Me miserum, si tu, cum diceris exulis uxor,
 50 avertis vultus et subit ora rubor !
 51 Me miserum, si turpe putas mihi nupta videri !
 52 Me miserum, si te jam pudet esse meam !
 53 Tempus ubi est illud quo te jactare solebas
 54 conjugue nec nomen dissimulare viri ?
 55 Tempus ubi est quo te (nisi non vis illa referri)
 56 et dici, memini, juvit et esse meam ?
 57 Utque proba dignum est, omni tibi dote placebam :
 58 addebat veris multa faventis amor,
 59 nec quem praeferres (ita res tibi magna videbar)
 60 quemque tuum mallet esse, vir alter erat.
 61 Nunc quoque ne pudeat quod sis mihi nupta, tuusque
 62 non debet dolor hinc, debet abesse pudor.
 63 Cum cecidit Capaneus subito temerarius ictu,
 64 num legis Euadnen erubuisse viro ?
 65 Nec, quia rex mundi compescuit ignibus ignes,
 66 ipse suis Phaethon infitiandus erat.
 67 Nec Semele Cadmo facta est aliena parenti
 68 quod precibus periit ambitiosa suis.
 69 Nec tibi, quod saevis ego sum Jovis ignibus ictus,
 70 purpureus molli fiat in ore pudor.
 71 Sed magis in curam nostri consurge tuendi
 72 exemplumque mihi conjugis esto bonae
 73 materiamque tuis tristem virtutibus imple !
 74 Ardua per praeceps gloria vadit iter.
 75 Hectors quis nosset, si felix Troja fuisset ?
 76 publica virtuti per mala facta via est.
 77 Ars tua, Tiphys, jacet, si non sit in aequore fluctus ;
 78 si valeant homines, ars tua, Phoebes, jacet.
 79 Quae latet inque bonis cessat non cognita rebus
 80 apparet virtus arguiturque malis.
 81 Dat tibi nostra locum tituli fortuna caputque
 82 conspicuum pietas qua tua tollat habet.
 83 Utere temporibus quorum nunc munere freta es,
 84 et patet in laudes area magna tuas.

T4_4 v.1 O qui, nominibus cum sis generosus avorum,
 2 exsuperas morum nobilitate genus,
 3 cujus inest animo patrii candoris imago,
 4 non careat numeris candor ut iste suis,
 5 cujus in ingenio est patriae facundia linguae,
 6 qua prior in Latio non fuit ulla foro,
 7 quod minime volui, positis pro nomine signis
 8 dictus es ; ignoscas laudibus ipse tuis.
 9 Nil ego peccavi ; tua te bona cognita produnt ;
 10 si, quod es, appares, culpa soluta mea est.
 11 Nec tamen officium nostro tibi carmine factum
 12 principe tam justo posse nocere puto.
 13 Ipse pater patriae (quid enim est civilius illo ?)
 14 sustinet in nostro carmine saepe legi,
 15 nec prohibere potest, quia res est publica Caesar,
 16 et de communi pars quoque nostra bono est.
 17 Juppiter ingeniis praebet sua numina vatum
 18 seque celebrari quolibet ore sinit.
 19 Causa tua exemplo superiorum tuta deorum est,

20 quorum hic aspicitur, creditur ille deus.
21 Ut non debuerim, tamen hoc ego crimen habeo :
22 non fuit arbitrii littera nostra tui.
23 Nec nova, quod tecum loquor, est injuria nostra,
24 incolumis cum quo saepe locutus eram.
25 Quo vereare minus ne sim tibi crimen amicus,
26 invidiam, si qua est, auctor habere potest.
27 Nam tuus est primis cultus mihi semper ab annis
28 (hoc certe noli dissimulare) pater ;
29 ingeniumque meum (potes hoc meminisse) probabat
30 plus etiam quam me iudice dignus eram ;
31 deque meis illo referebat versibus ore
32 in quo pars magnae nobilitatis erat.
33 Non igitur tibi nunc quod me domus ista recepit,
34 sed prius auctori sunt data verba tuo ;
35 non data sunt, mihi crede, tamen, sed in omnibus actis,
36 ultima si demas, vita tuenda mea est.
37 Hanc quoque qua perii culpam scelus esse negabis,
38 si tanti series sit tibi nota mali.
39 Aut timor aut error nobis, prius obfuit error ;
40 at sine me fati non meminisse mei !
41 neve retractando nondum coeuntia rumpam
42 vulnera : vix illis proderit ipsa quies.
43 Ergo, ut jure damus poenas, sic afuit omne
44 peccato facinus consiliumque meo.
45 Idque deus sentit ; pro quo nec lumen ademptum,
46 nec mihi detractas possidet alter opes.
47 Forsitan hanc ipsam, vivam modo, finiet olim,
48 tempore cum fuerit lenior ira, fugam.
49 Nunc precor hinc alio jubeat discedere, si non
50 nostra verecundo vota pudore carent.
51 Mitius exilium pauloque propinquius opto,
52 quique sit a saevo longius hoste locus.
53 Quantaque in Augusto clementia, si quis ab illo
54 hoc peteret pro me, forsitan ille daret.
55 Frigida me cohibent Euxini litora Ponti :
56 dictus ab antiquis Axenus ille fuit ;
57 nam neque jactantur moderatis aequora ventis
58 nec placidos portus hospita navis adit.
59 Sunt circa gentes quae praedam sanguine quaerunt
60 nec minus infida terra timetur aqua.
61 Illi quos audis hominum gaudere cruore
62 paene sub ejusdem sideris axe jacent ;
63 nec procul a nobis locus est, ubi Taurica dira
64 caede pharetratae pascitur ara deae.
65 Haec prius, ut memorant, non invidiosa nefandis
66 nec cupienda bonis regna Thoantis erant.
67 Hic pro subposita virgo Pelopeia cerva
68 sacra deae coluit qualiacumque suae.
69 Quo postquam, dubium pius an sceleratus, Orestes
70 exactus Furiis venerat ipse suis
71 et comes exemplum veri Phoceus amoris,
72 qui duo corporibus, mentibus unus erant,
73 protinus evincti tristem ducuntur ad aram
74 quae stabat geminas ante cruenta fores.
75 Nec tamen hunc sua mors, nec mors sua terruit illum :
76 alter ob alterius funera maestus erat.
77 Et jam constiterat stricto mucrone sacerdos

78 cinxerat et Graias barbara vitta comas,
 79 cum vice sermonis fratrem cognovit et illi
 80 pro nece complexus Iphigenia dedit.
 81 Laeta deae signum crudelia sacra perosae
 82 transtulit ex illis in meliora locis.
 83 Haec igitur regio, magni paene ultima mundi,
 84 quam fugere homines dique, propinqua mihi est ;
 85 aque mea terra prope sunt funebria sacra,
 86 si modo Nasoni barbara terra sua est.
 87 O utinam venti quibus est ablatas Orestes
 88 placato referant et mea vela deo !

T4_5 v.1 O mihi dilectos inter pars prima sodales,
 2 unica fortunis ara reperta meis,
 3 cujus ab adloquiis anima haec moribunda revixit,
 4 ut vigil infusa Pallade flamma solet,
 5 qui veritus non es portus aperire fideles
 6 fulmine percussae confugiumque rati,
 7 cujus eram censu non me sensurus egentem,
 8 si Caesar patrias eripuisset opes,
 9 temporis oblitum dum me rapit impetus hujus,
 10 excidit heu ! nomen quam mihi paene tuum !
 11 Tu tamen agnoscis tactusque cupidine laudis
 12 "Ille ego sum" cuperes dicere posse palam.
 13 Certe ego, si sineres, titulum tibi reddere vellem
 14 et raram famae conciliare fidem.
 15 Ne noceam grato vereor tibi carmine neve
 16 intempestivus nominis obstet honor.
 17 Quod licet - hoc tutum est - intra tua pectora gaude
 18 meque tui memorem teque fuisse pium,
 19 utque facis, remis ad opem luctare ferendam,
 20 dum veniat placido mollior aura deo,
 21 et tutare caput nulli servabile, si non
 22 qui mersit Stygia sublevet illud aqua.
 23 Teque, quod est rarum, praesta constanter ad omne
 24 indeclinatae munus amicitiae.
 25 Sic tua processus habeat fortuna perennes,
 26 sic ope non egeas ipse juvesque tuos ;
 27 sic aequet tua nupta virum probitate perenni,
 28 incidat et vestro rara querela toro ;
 29 diligat et semper socius te sanguinis illo
 30 quo pius affectu Castora frater amat ;
 31 sic juvenis similisque tibi sit natus et illum
 32 moribus agnoscat quilibet esse tuum ;
 33 sic faciat socerum lecto te nata jugali
 34 nec tardum juveni det tibi nomen avi.

T4_6 v.1 Tempore ruricolae patiens fit taurus aratri
 2 praebet et incurvo colla premenda jugo ;
 3 tempore paret equus lentis animosus habenis
 4 et placido duos accipit ore lupos ;
 5 tempore Poenorum compescitur ira leonum
 6 nec feritas animo quae fuit ante manet ;
 7 quaeque sui monitis obtemperat Inda magistri

8 belua, servitium tempore victa subit.
 9 Tempus, ut extensis tumeat facit uva racemis,
 10 vixque merum capiant grana quod intus habent ;
 11 tempus et in canas semen producit aristas,
 12 et ne sint tristi poma sapore cavet ;
 13 hoc tenuat dentem terras renovantis aratri,
 14 hoc rigidas silices, hoc adamanta terit,
 15 hoc etiam saevas paulatim mitigat iras,
 16 hoc minuit luctus maestaque corda levat.
 17 Cuncta potest igitur tacito pede lapsa vetustas
 18 praeterquam curas attenuare meas.
 19 Ut patria careo, bis frugibus area trita est,
 20 dissiluit nudo pressa bis uva pede ;
 21 nec quaesita tamen spatio patientia longo est,
 22 mensque mali sensum nostra recentis habet.
 23 Scilicet et veteres fugiunt juga saeva iuveni,
 24 et domitus freno saepe repugnat equus.
 25 Tristior est etiam praesens aerumna priore :
 26 ut sit enim sibi par, crevit et aucta mora est.
 27 Nec tam nota mihi, quam sunt, mala nostra fuerunt ;
 28 nunc magis hoc quo sunt cognitiora gravant.
 29 Est quoque non nihilum vires afferre recentes
 30 nec praeconsumptum temporis esse malis.
 31 Fortior in fulva novus est luctator harena
 32 quam cui sunt tarda brachia fessa mora ;
 33 integer est melior nitidis gladiator in armis
 34 quam cui tela suo sanguine tincta rubent.
 35 Fert bene praecipites navis modo facta procellas ;
 36 quamlibet exiguo solvitur imbre vetus.
 37 Nos quoque, quae ferimus, tulimus patientius ante,
 38 quae mala sunt longa multiplicata die.
 39 Credite, deficio, nostroque a corpore quantum
 40 auguror, accedent tempora parva malis.
 41 Nam neque sunt vires, nec qui color esse solebat ;
 42 vix habeo tenuem, quae tegat ossa, cutem.
 43 Corpore sed mens est aegro magis aegra malique
 44 in circumspectu stat sine fine sui.
 45 Urbis abest facies, absunt, mea cura, sodales,
 46 et, qua nulla mihi carior, uxor abest.
 47 Vulgus adest Scythicum bracataque turba Getarum.
 48 Sic me, quae video non videoque, movent.
 49 Una tamen spes est, quae me soletur in istis,
 50 haec fore morte mea non diuturna mala.

T4_7 v.1 Bis me sol adiit gelidae post frigora brumae,
 2 bisque suum tacto Pisce peregit iter.
 3 Tempore tam longo cur non tua dextera versus
 4 quamlibet in paucos officiosa fuit ?
 5 Cur tua cessavit pietas scribingentibus illis,
 6 exiguus nobis cum quibus usus erat ?
 7 Cur, quotiens alicui chartae sua vincula dempsi,
 8 illam speravi nomen habere tuum ?
 9 Di faciant ut saepe tua sit epistula dextra
 10 scripta, sed e multis reddita nulla mihi !
 11 Quod precor esse liquet ; credam prius ora Medusae
 12 Gorgonis anguineis cincta fuisse comis,

13 esse canes utero sub virginis, esse Chimaeram
 14 a truce quae flammis separet angue leam,
 15 quadrupedesque hominis cum pectore pectora junctos
 16 tergeminumque virum tergeminumque canem
 17 Sphingaque et Harpyias serpentipedesque Gigantes
 18 centimanumque Gyan semibovemque virum.
 19 Haec ego cuncta prius quam te, carissime, credam
 20 mutatum curam deposuisse mei.
 21 Innumeri montes inter me teque viaeque
 22 fluminaque et campi nec freta pauca jacent.
 23 Mille potest causis, a te quae littera saepe
 24 missa sit, in nostras rara venire manus.
 25 Mille tamen causas scribendo vince frequenter,
 26 excuse me ne te semper, amice, mihi.

T4_8 v.1 Jam mea cycneas imitantur tempora plumas
 2 inficit et nigras alba senecta comas ;
 3 jam subeunt anni fragiles et inertior aetas,
 4 jamque parum firmo me mihi ferre grave est.
 5 Nunc erat ut posito deberem fine laborum
 6 vivere cor nullo sollicitante metu,
 7 quaeque meae semper placuerunt otia menti
 8 carpere et in studiis molliter esse meis
 9 et parvam celebrare domum veteresque Penates
 10 et quae nunc domino rura paterna carent,
 11 inque sinu dominae carisque sodalibus inque
 12 securus patria consenuisse mea.
 13 Haec mea sic quondam peragi speraverat aetas ;
 14 hos ego sic annos ponere dignus eram.
 15 Non ita dis visum, qui me terraque marique
 16 actum Sarmaticis exposuere locis.
 17 In cava ducuntur quassae navalia puppes,
 18 ne temere in mediis dissoluantur aquis ;
 19 ne cadat et multas palmas inhonestet adeptos,
 20 languidus in pratis gramina carpit equus ;
 21 miles, ubi emeritis non est satis utilis annis,
 22 ponit ad antiquos, quae tulit arma, Lares.
 23 Sic igitur tarda vires minuente senecta
 24 me quoque donari jam rude tempus erat ;
 25 tempus erat nec me peregrinum ducere caelum
 26 nec siccam Getico fonte levare sitim,
 27 sed modo, quos habui, vacuos secedere in hortos,
 28 nunc hominum visu rursus et Urbe frui.
 29 Sic animo quondam non divinante futura
 30 optabam placide vivere posse senex.
 31 Fata repugnarunt, quae, cum mihi tempora prima
 32 mollia praebuerint, posteriora gravant,
 33 jamque decem lustris omni sine labe peractis
 34 parte premor vitae deteriore meae,
 35 nec procul a metis quas paene tenere videbar
 36 curriculo gravis est facta ruina meo.
 37 Ergo illum demens in me saevire coegi,
 38 mitius immensus quo nihil orbis habet
 39 ipsaque delictis victa est clementia nostris !
 40 Nec tamen erroris vita negata meo est,
 41 vita procul patria peragenda sub axe Boreo,

42 qua maris Euxini terra sinistra jacet.
 43 Hoc mihi si Delphi Dodonaque diceret ipsa,
 44 esse videretur vanus uterque locus.
 45 Nil adeo validum est, adamas licet alliget illud,
 46 ut maneat rapido firmius igne Jovis.
 47 Nil ita sublime est supraque pericula tendit,
 48 non sit ut inferius suppositumque deo.
 49 Nam quamquam vitio pars est contracta malorum,
 50 plus tamen exitii numinis ira dedit.
 51 At vos admoniti nostris quoque casibus este,
 52 aequantem Superos emeruisse virum.

T4_9 v.1 Si licet et pateris, nomen facinusque tacebo
 2 et tua Lethaeis acta dabuntur aquis,
 3 nostraque vincetur lacrimis sententia seris.
 4 Fac modo te pateat paenituisse tui !
 5 Fac modo te damnes cupiasque eradere vitae
 6 tempora, si possis, Tisiphonaea tuae.
 7 Sin minus, et flagrant odio tua pectora nostro,
 8 induet infelix arma coacta dolor.
 9 Sim licet extremum, sicut sum, missus in orbem,
 10 nostra suas isto porriget ira manus.
 11 Omnia, si nescis, Caesar mihi jura reliquit,
 12 et sola est patria poena carere mea.
 13 Et patriam, modo sit sospes, speramus ab illo :
 14 saepe Jovis telo quercus adusta viret.
 15 Denique vindictae si sit mihi nulla facultas,
 16 Pierides vires et sua tela dabunt.
 17 Quod Scythicis habitem longe submotus in oris
 18 siccaque sint oculis proxima signa meis,
 19 nostra per immensas ibunt praeconia gentes,
 20 quodque querar, notum, qua patet orbis, erit.
 21 Ibit ad occasum quicquid dicemus ob ortu,
 22 testis et Hesperiae vocis Eous erit ;
 23 trans ego tellurem, trans altas audiar undas,
 24 et gemitus vox est magna futura mei.
 25 Nec tua te sontem tantummodo saecula norint :
 26 perpetuae crimen posteritatis eris.
 27 Jam feror in pugnas et nondum cornua sumpsi,
 28 nec mihi sumendi causa sit ulla velim.
 29 Circus adhuc cessat, spargit jam torvus harenam
 30 taurus et infesto jam pede pulsat humum.
 31 Hoc quoque, quam volui, plus est : cane, Musa, receptus,
 32 dum licet huic nomen dissimulare suum.

T4_10 v.1 Ille ego qui fuerim, tenerorum lusor amorum,
 2 quem legis, ut noris, accipe, posteritas.
 3 Sulmo mihi patria est gelidis uberrimus undis,
 4 milia qui novies distat ab Urbe decem.
 5 Editus hic ego sum nec non ut tempora noris,
 6 cum cecidit fato consul uterque pari.
 7 Si quid id est, usque a proavis vetus ordinis heres,
 8 non modo fortunae munere factus eques.
 9 Nec stirps prima fui, genito sum fratre creatus

10 qui tribus ante quater mensibus ortus erat.
11 Lucifer amborum natalibus adfuit idem ;
12 una celebrata est per duo liba dies :
13 haec est armiferae festis de quinque Minervae,
14 quae fieri pugna prima cruenta solet.
15 Protinus excolimur teneri curaque parentis
16 imus ad insignes Urbis ab arte viros.
17 Frater ad eloquium viridi tendebat ab aevo,
18 fortia verbosi natus ad arma fori.
19 At mihi jam puero caelestia sacra placebant
20 inque suum furtim Musa trahebat opus.
21 Saepe pater dixit : "Studium quid inutile temptas ?
22 Maeonides nullas ipse reliquit opes."
23 Motus eram dictis totoque Helicone relicto
24 scribere temptabam verba soluta modis.
25 Sponte sua carmen numeros veniebat ad aptos,
26 et quod temptabam scribere versus erat.
27 Interea tacito passu labentibus annis
28 liberior fratri sumpta mihique toga est,
29 induiturque umeris cum lato purpura clavo,
30 et studium nobis, quod fuit ante, manet.
31 Jamque decem vitae frater geminaverat annos,
32 cum perit, et coepi parte carere mei.
33 Cepimus et tenerae primos aetatis honores
34 eque viris quondam pars tribus una fui.
35 Curia restabat : clavi mensura coacta est.
36 Majus erat nostris viribus illud onus ;
37 nec patiens corpus nec mens fuit apta labori,
38 sollicitaeque fugax ambitionis eram ;
39 et petere Aoniae suadebant tuta sorores
40 otia iudicio semper amata meo.
41 Temporis illius colui fovique poetas,
42 quotque aderant vates, rebar adesse deos.
43 Saepe suas Volucres legit mihi grandior aevo,
44 quaeque necet serpens, quae juvat herba, Macer ;
45 saepe suos solitus recitare Propertius ignes
46 jure sodalicii quo mihi junctus erat ;
47 Ponticus heroo, Bassus quoque clarus iambis
48 dulcia convictus membra fuere mei.
49 Et tenuit nostras numerosus Horatius aures,
50 dum ferit Ausonia carmina culta lyra.
51 Vergilium vidi tantum, nec avara Tibullo
52 tempus amicitiae fata dedere meae.
53 Successor fuit hic tibi, Galle, Propertius illi,
54 quartus ab his serie temporis ipse fui.
55 Utque ego majores, sic me coluere minores,
56 notaque non tarde facta Thalia mea est.
57 Carmina cum primum populo juvenilia legi,
58 barba resecta mihi bisve semelve fuit.
59 Moverat ingenium totam cantata per Urbem
60 nomine non vero dicta Corinna mihi.
61 Multa quidem scripsi, sed quae vitiosa putavi
62 emendaturis ignibus ipse dedi.
63 Tunc quoque, cum fugerem, quaedam placitura cremavi,
64 iratus studio carminibusque meis.
65 Molle Cupidineis nec inexpugnabile telis
66 cor mihi quodque levis causa moveret erat.
67 Cum tamen hic essem minimoque accenderer igni,

68 nomine sub nostro fabula nulla fuit.
69 Paene mihi puero nec digna nec utilis uxor
70 est data, quae tempus perbreve nupta fuit ;
71 illi successit quamvis sine crimine conjunx,
72 non tamen in nostro firma futura toro ;
73 ultima, quae mecum seros permansit in annos,
74 sustinuit conjunx exulis esse viri.
75 Filia me mea bis prima fecunda juventa,
76 sed non ex uno conjuge, fecit avum.
77 Et jam completrat genitor sua fata novemque
78 addiderat lustris altera lustra novem.
79 Non aliter flevi quam me fleturus ademptum
80 ille fuit. Matri proxima justa tuli.
81 Felices ambo tempestiveque sepulti,
82 ante diem poenae quod periere meae !
83 Me quoque felicem, quod non viventibus illis
84 sum miser et de me quod doluere nihil !
85 Si tamen extinctis aliquid nisi nomina restat
86 et gracilis structos effugit umbra rogos,
87 fama, parentales, si vos mea contigit, umbrae,
88 et sunt in Stygio crimina nostra foro,
89 scite, precor, causam (nec vos mihi fallere fas est)
90 errorem jussae, non scelus, esse fugae.
91 Manibus hoc satis est ! ad vos, studiosa, revertor
92 pectora, quae vitae quaeritis acta meae.
93 Jam mihi canities pulsus melioribus annis
94 venerat antiquas miscueratque comas.
95 Postque meos ortus Pisaea vinctus oliva
96 abstulerat decies praemia victor eques,
97 cum maris Euxini positos ad laeva Tomitas
98 quaerere me laesi principis ira jubet.
99 Causa meae cunctis nimium quoque nota ruinae
100 indicio non est testificanda meo.
101 Quid referam comitumque nefas famulosque nocentes ?
102 Ipsa multa tuli non leviora fuga.
103 Indignata malis mens est succumbere seque
104 praestitit invictam viribus usa suis ;
105 oblitusque mei ductaeque per otia vitae
106 insolita cepi temporis arma manu
107 totque tuli terra casus pelagoque quot inter
108 occultum stellae conspicuumque polum.
109 Tacta mihi tandem longis erroribus acto
110 juncta pharetratis Sarmatis ora Getis.
111 Hic ego finitimis quamvis circumsoner armis,
112 tristia, quo possum, carmine fata levo,
113 quod, quamvis nemo est cujus referatur ad aures,
114 sic tamen absumo decipioque diem.
115 Ergo, quod vivo durisque laboribus obsto
116 nec me sollicitae taedia lucis habent,
117 gratia, Musa, tibi ! Nam tu solacia praebes,
118 tu curae requies, tu medicina venis ;
119 tu dux et comes es ; tu nos abducis ab Histro
120 in medioque mihi das Helicone locum.
121 Tu mihi, quod rarum est, vivo sublime dedisti
122 nomen, ab exequiis quod dare fama solet.
123 Nec, qui detrectat praesentia, Livor iniquo
124 ullum de nostris dente momordit opus.
125 Nam tulerint magnos cum saecula nostra poetas,

126 non fuit ingenio fama maligna meo,
 127 cumque ego praeponam multos mihi, non minor illis
 128 dicor et in toto plurimus orbe legor.
 129 Si quid habent igitur vatum praesagia veri,
 130 protinus ut moriar, non ero, terra, tuus.
 131 Sive favore tuli sive hanc ego carmine famam,
 132 jure tibi grates, candide lector, ago.

T5_1 v.1 Hunc quoque de Getico, nostri studiose, libellum
 2 litore praemissis quattuor adde meis.
 3 Hic quoque talis erit qualis fortuna poetae :
 4 invenies toto carmine dulce nihil.
 5 Flebilis ut noster status est, ita flebile carmen,
 6 materiae scripto conveniente suae.
 7 Integer et laetus laeta et juvenalia lusi ;
 8 illa tamen nunc me composuisse piget.
 9 Ut cecidi, subiti perago praeconia casus
 10 sumque argumenti conditor ipse mei,
 11 utque jacens ripa deflere Caystrius ales
 12 dicitur ore suam deficiente necem,
 13 sic ego Sarmaticas longe projectus in oras
 14 efficio tacitum ne mihi funus eat.
 15 Delicias si quis lascivaque carmina quaerit,
 16 praemoneo, numquam est scripta quod ista legat.
 17 Aptior huic Gallus blandique Propertius oris,
 18 aptior, ingenium come, Tibullus erit.
 19 Atque utinam numero non nos essemus in isto !
 20 Ei mihi, cur unquam Musa jocata mea est ?
 21 Sed dedimus poenas Scythicique in finibus Histri
 22 ille pharetrati lusor Amoris abest.
 23 Quod superest, animos ad publica carmina flexi
 24 et memores jussi nominis esse sui.
 25 Si tamen ex vobis aliquis tam multa requireret
 26 unde dolenda canam, multa dolenda tuli.
 27 Non haec ingenio, non haec componimus arte :
 28 materia est propriis ingeniosa malis.
 29 Et quota fortunae pars est in carmine nostrae ?
 30 Felix qui patitur quae numerare potest !
 31 Quot frutices silvae, quot flavas Thybris harenas,
 32 mollia quot Martis gramina campus habet,
 33 tot mala pertulimus, quorum medicina quiesque
 34 nulla nisi in studio est Pieridumque mora.
 35 "Quis tibi, Naso, modus lacrimosi carminis ?" inquis.
 36 Idem fortunae qui modus hujus erit.
 37 Quod querar, illa mihi pleno de fonte ministrat
 38 nec mea sunt, fati verba sed ista mei.
 39 At mihi si cara patriam cum conjuge reddas,
 40 sint vultus hilares simque quod ante fui ;
 41 lenior invicti si sit mihi Caesaris ira,
 42 carmina laetitiae jam tibi plena dabo.
 43 Nec tamen, ut lusit, rursus mea littera ludet :
 44 sit semel illa joco luxuriata meo.
 45 Quod probet ipse, canam, poenae modo parte levata
 46 barbariam rigidos effugiamque Getas.

47 Interea nostri quid agant, nisi triste, libelli ?
 48 Tibia funeribus convenit ista meis.
 49 "At poteras, inquis , melius mala ferre silendo
 50 et tacitus casus dissimulare tuos."
 51 Exigis ut nulli gemitus tormenta sequantur
 52 acceptoque gravi vulnere flere vetas ?
 53 Ipse Perilleo Phalaris permisit in aere
 54 edere mugitus et bovis ore queri.
 55 Cum Priami lacrimis offensus non sit Achilles,
 56 tu fletus inhibes, durior hoste, meos ?
 57 Cum faceret Nioben orbam Latonia proles,
 58 non tamen et siccas jussit habere genas.
 59 Est aliquid fatale malum per verba levare.
 60 Hoc querulam Procnen Halcyonenque facit ;
 61 hoc erat in gelido quare Poeantius antro
 62 voce fatigaret Lemnia saxa sua.
 63 Strangulat inclusus dolor atque exaestuat intus
 64 cogitur et vires multiplicare suas.
 65 Da veniam potius, vel totos tolle libellos,
 66 sic mihi quod prodest si tibi, lector, obest.
 67 Sed neque obesse potest, ulli nec scripta fuerunt
 68 nostra nisi auctori pernicioosa suo.
 69 "At mala sunt." Fateor. Quis te mala sumere cogit
 70 aut quis deceptum ponere sumpta vetat ?
 71 Ipse nec emendo, sed ut hic deducta legantur ;
 72 non sunt illa suo barbariora loco,
 73 nec me Roma suis debet conferre poetis :
 74 inter Sauromatas ingeniosus eram.
 75 Denique nulla mihi captatur gloria quaeque
 76 ingeniis stimulos subdere fama solet.
 77 Nolumus assiduis animum tabescere curis,
 78 quae tamen inrumpunt quoque vetantur eunt.
 79 Cur scribam, docui. Cur mittam, quaeritis, isto ?
 80 Vobiscum cupio quolibet esse modo.

T5_2 v.1 Ecquid, ubi e Ponto nova venit epistula, palles,
 2 et tibi sollicita solvitur illa manu ?
 3 Pone metum : valeo corpusque, quod ante laborum
 4 impatiens nobis invalidumque fuit,
 5 sufficit, atque ipso vexatum induruit usu.
 6 An magis infirmo non vacat esse mihi ?
 7 Mens tamen aegra jacet nec tempore robora sumpsit,
 8 adfectusque animi, qui fuit ante, manet,
 9 quaeque mora spatioque suo coitura putavi
 10 vulnera non aliter quam modo facta dolent.
 11 Scilicet exiguis prodest annosa vetustas ;
 12 grandibus accedunt tempore damna malis.
 13 Paene decem totis aluit Poeantius annis
 14 pestiferum tumido vulnus ab angue datum.
 15 Telephus aeterna consumptus tabe perisset,
 16 si non, quae nocuit, dextra tulisset opem.
 17 Et mea, si facinus nullum commisimus, opto,
 18 vulnera qui fecit, facta levare velit.
 19 Contentusque mei jam tandem parte doloris
 20 exiguum pleno de mare demat aquae.
 21 Detrahat ut multum, multum restabit acerbi ;

22 parsque meae poenae totius instar erit.
23 Litora quot conchas, quot amoena rosaria flores,
24 quotve soporiferum grana papaver habet,
25 silva feras quot alit, quot piscibus unda natatur,
26 quot tenerum pennis aera pulsat avis,
27 tot premor adversis, quae si comprehendere coner,
28 Icariae numerum dicere coner aquae.
29 Utque viae casus, ut amara pericula ponti,
30 ut taceam strictas in mea fata manus,
31 barbara me tellus orbisque novissima magni
32 sustinet et saevo cinctus ab hoste locus.
33 Hinc ego traicerer (neque enim mea culpa cruenta est),
34 esset, quae debet, si tibi cura mei.
35 Ille deus, bene quo Romana potentia nixa est,
36 saepe suo victor lenis in hoste fuit.
37 Quid dubitas et tuta times ? accede rogaque !
38 Caesare nil ingens mitius orbis habet.
39 Me miserum ! quid agam, si proxima quaeque relinquunt ?
40 Subtrahis effracto tu quoque colla jugo ?
41 Quo ferar ? Unde petam lassis solacia rebus ?
42 Ancora jam nostram non tenet ulla ratem.
43 Videris ; ipse sacram, quamvis invisus, ad aram
44 confugiam : nullas submovet ara manus.
45 Alloquor en absens absentia numina supplex,
46 si fas est homini cum Jove posse loqui.
47 Arbiter imperii, quo certum est sospite cunctos
48 Ausoniae curam gentis habere deos,
49 o decus, o patriae per te florentis imago,
50 o vir non ipso, quem regis, orbe minor,
51 sic habites terras et te desideret aether !
52 sic ad pacta tibi sidera tardus eas !
53 Parce, precor, minimamque tuo de fulmine partem
54 deme ! Satis poenae, quod superabit, erit.
55 Ira quidem moderata tua est vitamque dedisti,
56 nec mihi jus civis nec mihi nomen abest,
57 nec mea concessa est aliis fortuna, nec exul
58 edicti verbis nominor ipse tui.
59 Omniaque haec timui, quia me meruisse videbam ;
60 sed tua peccato lenior ira meo est.
61 Arva relegatum jussisti visere Ponti,
62 et Scythicum profuga scindere puppe fretum.
63 Jussus ad Euxini deformia litora veni
64 aequoris, haec gelido terra sub axe jacet.
65 Nec me tam cruciat numquam sine frigore caelum
66 glebaque canenti semper obusta gelu,
67 nesciaque est vocis quod barbara lingua Latinae
68 Graecaque quod Getico victa loquela sono est,
69 quam quod finitimo cinctus premor undique Marte
70 vixque brevis tutum murus ab hoste facit.
71 Pax tamen interdum est, pacis fiducia numquam :
72 sic hic nunc patitur, nunc timet arma locus.
73 Hinc ego dum muter, vel me Zaclaea Charybdis
74 devoret, atque suis ad Styga mittat aquis,
75 vel rapidae flammis urar patienter in Aetnae,
76 vel freta Leucadii mittar in alta dei.
77 Quod petimus, poena est : neque enim miser esse recuso,
78 sed precor ut possim tutius esse miser.

T5_3 v.1 Illa dies haec est, qua te celebrare poetae,
 2 si modo non fallunt tempora, Bacche, solent,
 3 festaque odoratis innectunt tempora sertis,
 4 et dicunt laudes ad tua vina tuas.
 5 Inter quos, memini, dum me mea fata sinebant,
 6 non invisita tibi pars ego saepe fui,
 7 quem nunc suppositum stellis Cynosuridos Ursae
 8 juncta tenet crudis Sarmatis ora Getis,
 9 quique prius mollem vacuumque laboribus egi
 10 in studiis vitam Pieridumque choro,
 11 nunc procul a patria Geticis circumsonor armis,
 12 multa prius pelago multaque passus humo.
 13 Sive mihi casus, sive hoc dedit ira deorum,
 14 nubila nascenti seu mihi Parca fuit,
 15 tu tamen e sacris hederæ cultoribus unum
 16 numine debueras sustinuisse tuo.
 17 An dominae fati quicquid cecinere sorores,
 18 omne sub arbitrio desinit esse dei ?
 19 Ipse quoque aetherias meritis invectus es arces,
 20 quo non exiguo facta labore via est.
 21 Nec patria est habitata tibi, sed adusque nivosum
 22 Strymona venisti Marticolamque Geten
 23 Persidaque et lato spatiantem flumine Gangen
 24 et quascumque bibit decolor Indus aquas.
 25 Scilicet hanc legem nentes fatalia Parcae
 26 stamina bis genito bis cecinere tibi.
 27 Me quoque, si fas est exemplis ire deorum,
 28 ferrea sors vitae difficilisque premit,
 29 illo nec levius cecidi quem magna locutum
 30 reppulit a Thebis Juppiter igne suo.
 31 Ut tamen audisti percussum fulmine vatem,
 32 admonitu matris condoluisse potes,
 33 et potes aspiciens circum tua sacra poetas
 34 "Nescio quis nostri dicere "cultor abest."
 35 Fer, bone Liber, opem ! sic altera degravet ulmum
 36 vitis et incluso plena sit uva mero !
 37 Sic tibi cum Bacchis Satyrorum gnava juvenus
 38 adsit, et attonito non taceare sono !
 39 Ossa bipenniferi sic sint male pressa Lycurgi,
 40 impia nec poena Pentheos umbra vacet !
 41 Sic micet aeternum vicinaque sidera vincat
 42 conjugis in caelo clara Corona tuae !
 43 Huc ades et casus relevas, pulcherrime, nostros,
 44 unum de numero me memor esse tuo.
 45 Sunt dis inter se commercia : flectere tempta
 46 Caesareum numen numine, Bacche, tuo !
 47 Vos quoque, consortes studii, pia turba, poetae,
 48 haec eadem sumpto quisque rogare mero !
 49 Atque aliquis vestrum, Nasonis nomine dicto,
 50 adponat lacrimis pocula mixta suis
 51 admonitusque mei, cum circumspexerit omnes,
 52 dicat : "Ubi est nostri pars modo Naso chori ?"
 53 Idque ita, si vestrum merui candore favorem
 54 nullaque iudicio littera laesa meo est,
 55 si, veterum digne veneror cum scripta virorum,
 56 proxima non illis esse minora reor.

57 Sic igitur dextro faciatis Apolline carmen !
 58 Quod licet, inter vos nomen habete meum !

T5_4 v.1 Litore ab Euxino Nasonis epistula veni
 2 lassaque facta mari lassaque facta via.
 3 Qui mihi flens dixit : "Tu, cui licet, aspice Romam !
 4 Heu ! quanto melior sors tua sorte mea est !"
 5 Flens quoque me scripsit, nec qua signabar, ad os est
 6 ante, sed ad madidas gemma relata genas.
 7 Tristitiae causam si quis cognoscere quaerit,
 8 ostendi solem postulat ille sibi
 9 nec frondem in silvis nec aperto mollia prato
 10 gramina nec pleno flumine cernit aquam ;
 11 quid Priamus doleat mirabitur Hectore raptio
 12 quidve Philoctetes ictus ab angue gemat.
 13 Di facerent utinam talis status esset in illo
 14 ut non tristitiae causa dolenda foret !
 15 Fert tamen, ut debet, casus patienter amarus
 16 more nec indomiti frena recusat equi,
 17 nec fore perpetuam sperat sibi numinis iram
 18 conscius in culpa non scelus esse sua.
 19 Saepe refert sit quanta dei clementia cuius
 20 se quoque in exemplis adnumerare solet :
 21 nam quod opes teneat patrias, quod nomina civis,
 22 denique quod vivat, munus habere dei.
 23 Te tamen (o, si quid credis mihi, carior illi
 24 omnibus) in toto pectore semper habet ;
 25 teque Menoetiaden, te, qui comitatus Orestem,
 26 te vocat Aegiden Euryalumque suum ;
 27 nec patriam magis ille suam desiderat et quae
 28 plurima cum patria sentit abesse sibi
 29 quam vultus oculosque tuos, o dulcior illo
 30 melle quod in ceris Attica ponit apis.
 31 Saepe etiam maerens tempus reminiscitur illud
 32 quod non praeventum morte fuisse dolet ;
 33 cumque alii fugerent subitae contagia cladis
 34 nec vellent ictae limen adire domus,
 35 te sibi cum paucis meminit mansisse fidelem,
 36 si paucos aliquis tresve duosve vocat.
 37 Quamvis adtonitus, sensit tamen omnia nec te
 38 se minus adversis indoluisse suis.
 39 Verba solet vultumque tuum gemitusque referre
 40 et te flente suos emaduisse sinus,
 41 quam sibi praestiteris, qua consolatus amicum
 42 sis ope, solandus cum simul ipse fores.
 43 Pro quibus adfirmat fore se memoremque piumque,
 44 sive diem videat sive tegatur humo,
 45 per caput ipse suum solitus jurare tuumque,
 46 quod scio non illi vilis esse suo.
 47 Plena tot ac tantis referetur gratia factis,
 48 nec sinet ille tuos litus arare boves.
 49 Fac modo constanter profugum tueare ! quod ille,
 50 qui bene te novit, non rogat, ipsa rogo.

T5_5 v.1 Annuus adsuetum dominae natalis honorem
 2 exigit : ite, manus, ad pia sacra, meae.
 3 Sic quondam festum Laertius egerat heros
 4 forsam in extremo conjugis orbe diem.
 5 Lingua favens adsit nostrorum oblita malorum,
 6 quae, puto, dedidicit jam bona verba loqui,
 7 quaeque semel toto vestis mihi sumitur anno,
 8 sumatur fatis discolor alba meis ;
 9 araque gramineo viridis de caespite fiat
 10 et velet tepidos nexa corona focos.
 11 Da mihi tura, puer, pingues facientia flammis,
 12 quodque pio fusum stridat in igne merum.
 13 Optime Natalis ! quamvis procul absumus, opto
 14 candidus huc venias dissimilisque meo ;
 15 si quod et instabat dominae miserabile vulnus,
 16 sit perfuncta meis tempus in omne malis ;
 17 quaeque gravi nuper plus quam quassata procella est,
 18 quod superest, tutum per mare navis eat.
 19 Illa domo nataque sua patriaque fruatur
 20 (erepta haec uni sit satis esse mihi),
 21 quatenus et non est in caro conjuge felix,
 22 pars vitae tristi cetera nube vacet !
 23 Vivat, ametque virum, quoniam sic cogitur, absens
 24 consumatque annos, sed diuturna, suos ;
 25 adicerem et nostros, sed ne contagia fati
 26 corrumpant timeo, quos agit ipsa, mei.
 27 Nil homini certum est : fieri quis posse putaret
 28 ut facerem in mediis haec ego sacra Getis ?
 29 Aspice ut aura tamen fumos e ture coortos
 30 in partes Italas et loca dextra ferat.
 31 Sensus inest igitur nebulis, quas exigit ignis.
 32 Consilio fugiunt aethera, Ponte, tuum.
 33 Consilio commune sacrum cum fiat in ara
 34 fratribus alterna qui periire manu,
 35 ipsa sibi discors, tamquam mandetur ab illis,
 36 scinditur in partes atra favilla duas.
 37 Hoc, memini, quondam fieri non posse loquebar,
 38 et me Battiades iudice falsus erat.
 39 Omnia nunc credo, cum tu non stultus ab Arcto
 40 terga, vapor, dederis Ausoniamque petas.
 41 Haec ergo lux est, quae si non orta fuisset,
 42 nulla fuit misero festa videnda mihi.
 43 Edidit haec mores illis heroisin aequos,
 44 quis erat Eetion Icariusque pater ;
 45 nata pudicitia est, mores probitasque fidesque,
 46 at non sunt ista gaudia nata die,
 47 sed labor et curae fortunaque moribus impar,
 48 justaque de viduo paene querela toro.
 49 Scilicet adversis probitas exercita rebus
 50 tristi materiam tempore laudis habet :
 51 si nihil infesti durus vidisset Ulixes,
 52 Penelope felix, sed sine laude, foret.
 53 Victor Echionias si vir penetrasset in arces,
 54 forsitan Euadnen vix sua nosset humus ;
 55 cum Pelia genitae tot sint, cur nobilis una est ?
 56 Nempe fuit misero nupta quod una viro.
 57 Effice ut Iliacas tangat prior alter harenas :
 58 Laodamia nihil cur referatur erit ;

59 et tua, quod mallet, pietas ignota maneret,
 60 implerent venti si mea vela sui.
 61 Di tamen et Caesar dis accessure, sed olim,
 62 aequarint Pylios cum tua fata dies,
 63 non mihi qui poenam fateor meruisse, sed illi
 64 parcite quae nullo digna dolore dolet.

T5_6 v.1 Tu quoque, nostrarum quondam fiducia rerum,
 2 qui mihi confugium, qui mihi portus eras,
 3 tu quoque suscepti curam dimittis amici
 4 officiique pium tam cito ponis onus ?
 5 Sarcina sum, fateor, quam si non tempore nostro
 6 depositurus eras, non subeunda fuit.
 7 Fluctibus in mediis navem, Palinure, relinquis ?
 8 Ne fuge, neve tua sit minor arte fides !
 9 Numquid Achilleos inter fera proelia fidi
 10 deseruit levitas Automedontis equos ?
 11 Quem semel excepit, numquam Podalirius aegro
 12 promissam medicae non tulit artis opem.
 13 Turpius eicitur quam non admittitur hospes ;
 14 quae patuit, dextrae firma sit ara meae.
 15 Nil nisi me solum primo tutatus es, at nunc
 16 me pariter serva iudiciumque tuum,
 17 si modo non aliqua est in me nova culpa tuamque
 18 mutarunt subito crimina nostra fidem.
 19 Spiritus hic, Scythica quem non bene ducimus aura,
 20 quod cupio, membris exeat ante meis
 21 quam tua delicto stringantur pectora nostro
 22 et videar merito vilior esse tibi.
 23 Non adeo toti fatiis urgemur iniquis
 24 ut mea sit longis mens quoque mota malis.
 25 Finge tamen motam : quotiens Agamemnone natum
 26 dixisse in Pyladen improba verba putas ?
 27 Nec procul a vero est quin et pulsarit amicum :
 28 mansit in officiis non minus ille suis.
 29 Hoc est cum miseris solum commune beatis,
 30 ambobus tribui quod solet obsequium :
 31 ceditur et caecis et quos praetexta verendos
 32 virgaque cum verbis imperiosa facit.
 33 Si mihi non parcis, fortunae parcere debes :
 34 non habet in nobis ullius ira locum.
 35 Elige nostrorum minimum minimumque laborum :
 36 isto quod quereris grandius illud erit.
 37 Quam multa madidae celantur harundine fossae,
 38 florida quam multas Hybla tuetur apes,
 39 quam multae gracili terrena sub horrea ferre
 40 limite formicae grana reperta solent,
 41 tam me circumstat densorum turba malorum.
 42 Crede mihi, vero est nostra querela minor.
 43 His qui contentus non est, in litus harenas,
 44 in segetem spicas, in mare fundat aquas.
 45 Intempestivos igitur compesce tumores
 46 vela nec in medio desere nostra mari.

T5_7 v.1 Quam legis, ex illa tibi venit epistula terra,
 2 latus ubi aequoreis additur Hister aquis.
 3 Si tibi contingit cum dulci vita salute,
 4 candida fortunae pars manet una meae.
 5 Scilicet, ut semper, quid agam, carissime, quaeris,
 6 quamvis hoc vel me scire tacente potes :
 7 sum miser (haec brevis est nostrorum summa malorum)
 8 quisquis et offenso Caesare vivit, erit.
 9 Turba Tomitanae quae sit regionis et inter
 10 quos habitem mores discere cura tibi est ?
 11 Mixta sit haec quamvis inter Graecosque Getasque,
 12 a male pacatis plus trahit ora Getis ;
 13 Sarmaticae major Geticaeque frequentia gentis
 14 per medias in equis itque reditque vias.
 15 In quibus est nemo qui non coryton et arcum
 16 telaque vipereo lurida felle gerat.
 17 Vox fera, trux vultus, verissima Martis imago ;
 18 non coma, non ulla barba resecta manu ;
 19 dextera non segnis fixo dare vulnera cultro,
 20 quem junctum lateri barbarus omnis habet.
 21 Vivit in his, heu ! nunc lusorum oblitus amorum,
 22 hos videt, hos vates audit, amice, tuus !
 23 Atque utinam vivat non et moriatur in illis,
 24 absit ab invisis et tamen umbra locis.
 25 Carmina quod pleno saltari nostra theatro
 26 versibus et plaudi scribis, amice, meis :
 27 nil equidem feci (tu scis hoc ipse) theatri,
 28 Musa nec in plausus ambitiosa mea est.
 29 Non tamen ingratum est quodcumque oblivia nostri
 30 impedit et profugi nomen in ora refert.
 31 Quamvis interdum, quae me laesisse recordor,
 32 carmina devoveo Pieridasque meas,
 33 cum bene devovi, nequeo tamen esse sine illis,
 34 vulneribusque meis tela cruenta sequor,
 35 quaeque modo Euboicis lacerata est fluctibus, audet
 36 Graia Caphaream currere puppis aquam.
 37 Nec tamen ut lauder vigilo curamque futuri
 38 nominis, utilius quod latuisset, ago.
 39 Detineo studiis animum falloque dolores,
 40 experior curis et dare verba meis.
 41 Quid potius faciam desertis solus in oris,
 42 quamve malis aliam quaerere coner opem ?
 43 Sive locum specto, locus est inamabilis et quo
 44 esse nihil toto tristius orbe potest,
 45 sive homines, vix sunt homines hoc nomine digni
 46 quamque lupi saevae plus feritatis habent :
 47 non metuunt leges, sed cedit viribus aequum
 48 victaque pugnaci jura sub ense jacent.
 49 Pellibus et laxis arcent mala frigora braxis
 50 oraque sunt longis horrida tecta comis.
 51 In paucis extant Graecae vestigia linguae,
 52 haec quoque jam Getico barbara facta sono.
 53 Unus in hoc nemo est populo qui forte Latine
 54 quaelibet e medio reddere verba queat.
 55 Ille ego Romanus vates (ignoscite, Musae !)
 56 Sarmatico cogor plurima more loqui.
 57 En pudet et fateor, jam desuetudine longa
 58 vix subeunt ipsi verba Latina mihi.

59 Nec dubito quin sint et in hoc non pauca libello
 60 barbara : non hominis culpa, sed ista loci.
 61 Ne tamen Ausoniae perdam commercia linguae,
 62 et fiat patrio vox mea muta sono,
 63 ipse loquor mecum desuetaque verba retracto,
 64 et studii repeto signa sinistra mei.
 65 Sic animum tempusque traho, me sicque reduco
 66 a contemplatu summoveoque mali.
 67 Carminibus quaero miserarum obliviam rerum :
 68 praemia si studio consequar ista, sat est.

T5_8 v.1 Non adeo cecidi, quamvis abjectus, ut infra
 2 te quoque sim, inferius quo nihil esse potest.
 3 Quae tibi res animos in me facit, improbe, curve
 4 casibus insultas quos potes ipse pati ?
 5 Nec mala te reddunt mitem placidumque jacenti
 6 nostra quibus possint inlacrimare ferae.
 7 Nec metuis dubio Fortunae stantis in orbe
 8 numen et exosae verba superba deae :
 9 exigit a dignis ultrix Rhamnusia poenas.
 10 Imposito calcas quid mea fata pede ?
 11 Vidi ego naufragium qui risit aequore mergi,
 12 et "Numquam, dixi, justior unda fuit."
 13 Vilia qui quondam miseris alimenta negarat
 14 nunc mendicato pascitur ipse cibo.
 15 Passibus ambiguus Fortuna volubilis errat
 16 et manet in nullo certa tenaxque loco,
 17 sed modo laeta monet, vultus modo sumit acerbos
 18 et tantum constans in levitate sua est.
 19 Nos quoque floruimus, sed flos erat ille caducus,
 20 flammaque de stipula nostra brevisque fuit.
 21 Neve tamen tota capias fera gaudia mente,
 22 non est placandi spes mihi nulla dei,
 23 vel quia peccavi citra scelus, utque pudore
 24 non caret, invidia sic mea culpa caret,
 25 vel quia nil ingens ad finem solis ab ortu
 26 illo, cui paret, mitius orbis habet.
 27 Scilicet ut non est per vim superabilis ulli,
 28 molle cor ad timidas sic habet ille preces,
 29 exemplo deum, quibus accessurus et ipse est,
 30 cum poenae venia plura roganda petam :
 31 Si numeres anno soles et nubila toto,
 32 invenies nitidum saepius isse diem.
 33 Ergo ne nimium nostra laetere ruina,
 34 restitui quondam me quoque posse puta !
 35 Posse puta fieri lenito principe vultus
 36 ut videas media tristis in Urbe meos
 37 utque ego te videam causa graviore fugatum !
 38 Haec sunt a primis proxima vota meis.

T5_9 v.1 O tua si sineres in nostris nomina poni
 2 carminibus, positus quam mihi saepe fores !
 3 Te canerem solum, meriti memor, inque libellis
 4 crevisset sine te pagina nulla meis.

5 Quid tibi deberem tota sciretur in Urbe,
 6 exul in amissa si tamen Urbe legor.
 7 Te praesens mitem nosset, te serior aetas,
 8 scripta vetustatem si modo nostra ferunt.
 9 Nec tibi cessaret doctus bene dicere lector :
 10 hic te servato vate maneret honor.
 11 Caesaris est primum munus quod ducimus auras ;
 12 gratia post magnos est tibi habenda deos.
 13 Ille dedit vitam ; tu, quam dedit ille, tueris
 14 et facis accepto munere posse frui.
 15 Cumque perhorruerit casus pars maxima nostros,
 16 pars etiam credi pertimuisse velit
 17 naufragiumque meum tumulo spectarit ab alto
 18 nec dederit nanti per freta saeva manum,
 19 seminecem Stygia revocasti solus ab unda.
 20 Hoc quoque, quod memores possumus esse, tuum est.
 21 Di tibi se tribuant cum Caesare semper amicos !
 22 non potuit votum plenius esse meum.
 23 Haec meus argutis, si tu paterere, libellis
 24 poneret in multa luce videnda labor.
 25 Nunc quoque se, quamvis est jussa quiescere, quin te
 26 nominet invitum vix mea Musa tenet.
 27 Utque canem pavidae nactum vestigia cervae
 28 latrantem frustra copula dura tenet,
 29 utque fores nondum reserati carceris acer
 30 nunc pede, nunc ipsa fronte lacessit equus,
 31 sic mea lege data vincta atque inclusa Thalia
 32 per titulum vetiti nominis ire cupit.
 33 Ne tamen officio memoris laedaris amici,
 34 parebo jussis (parce timere) tuis.
 35 At non parerem, si non meminisse putares.
 36 Hoc quod non prohibet vox tua, gratus ero,
 37 dumque (quod o breve sit !) lumen vitale videbo,
 38 serviet officio spiritus iste tuo.

T5_10 v.1 Ut sumus in Ponto, ter frigore constitit Hister,
 2 facta est Euxini dura ter unda maris.
 3 At mihi jam videor patria procul esse tot annis
 4 Dardana quot Graio Troja sub hoste fuit.
 5 Stare putes, adeo procedunt tempora tarde
 6 et peragit lentis passibus annus iter.
 7 Nec mihi solstitium quicquam de noctibus aufert,
 8 efficit angustos nec mihi bruma dies :
 9 scilicet in nobis rerum natura novata est
 10 cumque meis curis omnia longa facit.
 11 An peragunt solitos communia tempora motus
 12 suntque magis vitae tempora dura meae,
 13 quem tenet Euxini mendax cognomine litus
 14 et Scythici vere terra sinistra freti ?
 15 Innumerae circa gentes fera bella minantur,
 16 quae sibi non rapto vivere turpe putant.
 17 Nil extra tutum est : tumulus defenditur ipse
 18 moenibus exiguis ingenioque loci.
 19 Cum minime credas, ut aves, densissimus hostis
 20 advolat et praedam vix bene visus agit.
 21 Saepe intra muros clausis venientia portis

22 per medias legimus noxia tela vias.
 23 Est igitur rarus rus qui colere audeat, isque
 24 hac arat infelix, hac tenet arma manu.
 25 Sub galea pastor junctis pice cantat avenis,
 26 proque lupo pavidae bella verentur oves.
 27 Vix ope castelli defendimur et tamen intus
 28 mixta facit Graecis barbara turba metum.
 29 Quippe simul nobis habitat discrimine nullo
 30 barbarus et tecti plus quoque parte tenet.
 31 Quos ut non timeas, possis odisse videndo
 32 pellibus et longa pectora tecta coma.
 33 Hos quoque, qui geniti Graia creduntur ab urbe,
 34 pro patrio cultu Persica braca tegit.
 35 Exercent illi sociae commercia linguae :
 36 per gestum res est significanda mihi.
 37 Barbarus hic ego sum, qui non intellegor ulli,
 38 et rident stolidi verba Latina Getae,
 39 meque palam de me tuto mala saepe loquuntur,
 40 forsitan obiciunt exiliumque mihi ;
 41 utque fit, in me aliquid, si quid dicentibus illis
 42 abnuerim quotiens adnuerimque, putant.
 43 Adde quod injustum rigido jus dicitur ense,
 44 dantur et in medio vulnera saepe foro.
 45 O duram Lachesin, quae tam grave sidus habenti
 46 fila dedit vitae non breviora meae !
 47 Quod patriae vultu vestroque caremus, amici,
 48 atque hic in Scythicis gentibus esse queror,
 49 utraque poena gravis. Merui tamen Urbe carere,
 50 non merui tali forsitan esse loco.
 51 Quid loquor, a ! demens ? ipsam quoque perdere vitam
 52 Caesaris offenso numine dignus eram.

T5_11 v.1 Quod te nescio quis per jurgia dixerit esse
 2 exulis uxorem littera questa tua est.
 3 Indolui, non tam mea quod fortuna male audit,
 4 qui jam consuevi fortiter esse miser,
 5 quam quod, cui minime vellem, sum causa pudoris
 6 teque reor nostris erubuisse malis.
 7 Perfer et obdura ! multo graviora tulisti,
 8 eripuit cum me principis ira tibi.
 9 Fallitur iste tamen quo iudice nominor exul :
 10 mollior est culpam poena secuta meam.
 11 Maxima poena mihi est ipsum offendisse priusque
 12 venisset mallet funeris hora mihi.
 13 Quassa tamen nostra est, non mersa nec obruta navis ;
 14 utque caret portu, sic tamen exstat aquis.
 15 Nec vitam nec opes nec jus mihi civis ademit,
 16 qui merui vitio perdere cuncta meo ;
 17 sed quia peccato facinus non adfuit illi,
 18 nil nisi me patriis jussit abesse focis ;
 19 utque aliis, quorum numerum comprehendere non est,
 20 Caesareum numen sic mihi mite fuit.
 21 Ipse relegati, non exulis utitur in me
 22 nomine : tuta suo iudice causa mea est.
 23 Jure igitur laudes, Caesar, pro parte virili
 24 carmina nostra tuas qualiacumque canunt ;

25 jure deos, ut adhuc caeli tibi limina claudant
 26 teque velint sine se comprecor esse deum.
 27 Optat idem populus, sed ut in mare flumina vastum,
 28 sic solet exiguae currere rivus aquae.
 29 At tu fortunam, cujus vocor exul ab ore,
 30 nomine mendaci parce gravare meam !

T5_12 v.1 Scribis ut oblectem studio lacrimabile tempus,
 2 ne pereant turpi pectora nostra situ.
 3 Difficile est quod, amice, mones, quia carmina laetum
 4 sunt opus et pacem mentis habere volunt.
 5 Nostra per adversas agitur fortuna procellas
 6 sorte nec ulla mea tristior esse potest.
 7 Exigis ut Priamus natorum funere plaudat
 8 et Niobe festos ducat ut orba choros.
 9 Luctibus an studio videor debere teneri
 10 solus in extremos jussus abire Getas ?
 11 Des licet in valido pectus mihi robore fultum,
 12 fama refert Anyti quale fuisse reo,
 13 fracta cadet tantae sapientia mole ruinae :
 14 plus valet humanis viribus ira dei.
 15 Ille senex, dictus sapiens ab Apolline, nullum
 16 scribere in hoc casu sustinisset opus.
 17 Ut veniant patriae, veniant oblivia vestri,
 18 omnis ut amissi sensus abesse queat,
 19 at timor officio fungi vetat ipse quietum :
 20 cinctus ab innumero me tenet hoste locus.
 21 Adde quod ingenium longa rubigine laesum
 22 torpet et est multo, quam fuit ante, minus.
 23 Fertilis, adsiduo si non renovatur aratro,
 24 nil nisi cum spinis gramen habebit ager ;
 25 tempore qui longo steterit, male curret et inter
 26 carceribus missos ultimus ibit equus ;
 27 vertitur in teneram cariem rimisque dehiscit,
 28 si qua diu solitis cumba vacavit aquis.
 29 Me quoque despera, fuerim cum parvus et ante,
 30 illi, qui fueram, posse redire parem.
 31 Contudit ingenium patientia longa malorum
 32 et pars antiqui nulla vigoris adest.
 33 Saepe tamen nobis, ut nunc quoque, sumpta tabella est
 34 inque suos volui cogere verba pedes :
 35 carmina nulla mihi sunt scripta aut qualia cernis,
 36 digna sui domini tempore, digna loco.
 37 Denique non parvas animo dat gloria vires
 38 et fecunda facit pectora laudis amor.
 39 Nominis et famae quondam fulgore trahebar,
 40 dum tulit antemnas aura secunda meas.
 41 Non adeo est bene nunc ut sit mihi gloria curae :
 42 si liceat, nulli cognitus esse velim.
 43 An, quia cesserunt primo bene carmina, suades
 44 scribere, successus ut sequar ipse meos ?
 45 Pace, novem, vestra liceat dixisse, Sorores :
 46 vos estis nostrae maxima causa fugae ;
 47 utque dedit justas tauri fabricator aeni,
 48 sic ego do poenas artibus ipse meis.
 49 Nil mihi debebat cum versibus amplius esse,

50 cum fugerem merito naufragus omne fretum.
 51 At puto, si demens studium fatale retemptem,
 52 hic mihi praebebit carminis arma locus.
 53 Non liber hic ullus, non qui mihi commodet aurem
 54 verbaque significant quid mea norit, adest.
 55 Omnia barbariae loca sunt vocisque ferinae,
 56 omnia sunt Getici plena timore soni.
 57 Ipse mihi videor jam dedidicisse Latine :
 58 jam didici Getice Sarmaticeque loqui.
 59 Nec tamen, ut verum fatear tibi, nostra teneri
 60 a componendo carmine Musa potest.
 61 Scribimus et scriptos absumimus igne libellos :
 62 exitus est studii parva favilla mei.
 63 Nec possum, et cupio non nullos ducere versus :
 64 ponitur idcirco noster in igne labor,
 65 nec nisi pars casu flammis erepta dolove
 66 ad vos ingenii pervenit ulla mei.
 67 Sic utinam, quae nil metuentem tale magistrum
 68 perdidit, in cineres Ars mea versa foret !

T5_13 v.1 Hanc tuus e Getico mittit tibi Naso salutem,
 2 mittere si quisquam, quo caret ipse, potest.
 3 Aeger enim traxi contagia corpore mentis,
 4 libera tormento pars mihi ne qua vacet ;
 5 perque dies multos lateris cruciatibus uror,
 6 saeva quod inmodico frigore laesit hiems.
 7 Si tamen ipse vales, aliqua nos parte valemus ;
 8 quippe mea est umeris fulta ruina tuis.
 9 Quid, mihi cum dederis ingentia pignora cumque
 10 per numeros omnes hoc tueare caput,
 11 quod tua me raro solatur epistula, peccas
 12 remque piam praestas, si mihi verba negas ?
 13 Hoc, precor, emenda ! quod si correxeris unum,
 14 nullus in egregio corpore naevus erit.
 15 Pluribus accusem, fieri nisi possit ut ad me
 16 littera non veniat, missa sit illa tamen.
 17 Di faciant ut sit temeraria nostra querela
 18 teque putem falso non meminisse mei.
 19 Quod precor, esse liquet : neque enim mutabile robur
 20 credere me fas est pectoris esse tui.
 21 Cana prius gelido desint absinthia Ponto
 22 et careat dulci Trinacris Hybla thymo,
 23 inmemorem quam te quisquam convincat amici :
 24 non ita sunt fati stamina nigra mei.
 25 Tu tamen, ut possis falsae quoque pellere culpa
 26 crimina, quod non es, ne videare, cave ;
 27 utque solebamus consumere longa loquendo
 28 tempora sermoni deficiente die,
 29 sic ferat ac referat tacitas nunc littera voces
 30 et peragant linguae charta manusque vices.
 31 Quod fore ne nimium videar diffidere sitque
 32 versibus hoc paucis admonuisse satis,
 33 accipe quo semper finitur epistula verbo,
 34 atque, meis distent ut tua fata, vale !

T5_14 v.1 Quanta tibi dederim nostris monumenta libellis
 2 o mihi me conjunx carior, ipsa vides.
 3 Detrahat auctori multum fortuna licebit,
 4 tu tamen ingenio clara ferere meo,
 5 dumque legar, mecum pariter tua fama legetur,
 6 nec potes in maestos omnis abire rogos.
 7 Cumque viri casu possis miseranda videri,
 8 inuenies aliquas quae, quod es, esse velint,
 9 quae te, nostrorum cum sis in parte malorum,
 10 felicem dicant inuideantque tibi.
 11 Non ego divitias dando tibi plura dedissem :
 12 nil feret ad Manes divitis umbra suos.
 13 Perpetui fructum donavi nominis idque,
 14 quo dare nil potui munere majus, habes.
 15 Adde quod, ut rerum sola es tutela mearum,
 16 ad te non parvi venit honoris onus,
 17 quod numquam vox est de te mea muta tuique
 18 indiciis debes esse superba viri.
 19 Quae ne quis possit temeraria dicere, persta
 20 et pariter serva meque piamque fidem.
 21 Nam tua, dum stetimus, turpi sine crimine mansit
 22 et tantum probitas inreprehensa fuit.
 23 Area de nostra nunc est tibi facta ruina :
 24 conspicuum virtus hic tua ponat opus !
 25 Esse bonam facile est, ubi quod vetet esse remotum est
 26 et nihil officio nupta quod obstet habet.
 27 Cum deus intonuit, non se subducere nimbo,
 28 id demum est pietas, id socialis amor.
 29 Rara quidem virtus quam non Fortuna gubernet,
 30 quae maneat stabili, cum fugit illa, pede ;
 31 si qua tamen pretii sibi merces ipsa petiti
 32 inque parum laetis ardua rebus adest,
 33 ut tempus numeres, per saecula nulla tacetur,
 34 et loca mirantur, qua patet orbis iter.
 35 Aspicias ut longo teneat laudabilis aevo
 36 nomen inextinctum Penelopea fides ?
 37 Cernis ut Admeti cantetur et Hectoris uxor
 38 ausaque in accensos Iphias ire rogos ?
 39 Ut vivat fama conjunx Phylaceia cujus
 40 Iliacam celeri vir pede pressit humum ?
 41 Morte nihil opus est pro me, sed amore fideque :
 42 non ex difficili fama petenda tibi est.
 43 Nec te credideris, quia non facis, ista moneri :
 44 vela damus, quamvis remige puppis eat.
 45 Qui monet ut facias, quod jam facis, ille monendo
 46 laudat, et hortatu comprobat acta suo.